

Ulloq ataatsimiiffik siulleg, sisamannorneq 1. decemberip 2005, nal. 11:15

Oqaluuserisassani immikkoortoq 1.

Ataatsimiinnerup ammarneqarnera.

(Inatsisartut sivilunerpaamik ilaasortaasimasunit angajulleq)

Ataatsimiinnermik aqutsisoq: Jonathan Motzfeldt, Inatsisartut Siulittaasuat, Siumut.

Jonathan Motzfeldt, (Inatsisartut sivilunerpaamik ilaasortaasimasunit angajulleq)

Ataatsimiinneq ammarpoq.

Inatsisartunut qinigaarlaani, Namminersornerunerup 1979-imi atuutilersinneqarneranit Inatsisartut qulingiluassaanni sivilunerpaamik ilaasortaasimasutut Inatsisartunut ilaasortat 2005-imi Inissitsiterluni Ataatsimiinnissamut uummamit pisumik tikilluaquakka.

Inatsisartut Naalackersuisullu pillugit Inatsisartut inatsisaanni § 1 naapertorlugu Inatsisartunut ilaasortaq sivilunerpaamik ilaasortaasimasoq, arlallillu assigiimmik sivilussusilimmik ilaasortaasimappata taakkunannga angajulleq, pisussaaitaavoq Inatsisartut Inissitsiterlutik Ataatsimiinnissaannut Inatsisartut ataatsimiigiaqqussallugit.

Taamatut atuunna atorlugu Inatsisartut ataatsimiigiaqqusimavakka. Ulloq 15. november 2005 qinersinerup ingerlanneqarnerani qinersinerup inernerata qinersinermut ataatsimiititaliamit naatsorsorneqarnera tunngavigalugu ataatsimiigiaqqusineq pivoq.

Takusinnaavara ilaasortat tamarmiullutik matumani inissitsiterluni ataatsimiinnissap aallartinnissaanut tikissimasut, taamaalillunilu Inatsisartut qinigaarlaat tamakkiisumik aalajangiisinnaassuseqartut.

Ulloq 15. november ukioq manna qinersinermi Inatsisartunut siusinnerusukkut ilaasortaasimasut ilaat ilaasortanit nutaanit 11-usunit taarserneqarsimapput. Taamaammat Inatsisartunut ilaasortat nutaat taakku immikkut tikilluaqqaqqujumavakka. Aamma ilisarismariikkat tikilluaqqungaarpakka. Tamassinnut atuuttumik oqaatigissavara qinigaaffimmi aallartittumi pitsaasumik anguniagaqarfiusumillu suleqatigiinnissatsinnut qilanaarama.

Ilisimatitsissutigineqassaaq Inatsisartut sinnerlugit Ataqqinartorsuaq Dronning Margrethe Aappaat, qallunaat naalackersuisui, Folketingi, Islandip Altingia Savalimmiullu Lagtingiat inuulluaqqussummik nassikkakkit.

Taamaalillugu nalunaarutigaa Inatsisartut Inissitsiterlutik Ataatsimiinnerat 2005 ammarneqartoq.

Maannalu ullormut oqaluuserisassatut siunnersuutigineqartut naatsumik nassuiaatigissavakka. Inatsisartut taakkulu ataatsimiititaliaat inissitsitersinnaaqqullugit Naalackersuisullu qinigaasinnaaqqullugit iliuuserineqartussat pisariaqartut taakku malillugit suliarineqarput.

Inatsisartunut Siulittaasoqarfik Naalackersuisullu qinigaareerpata 2006-imi aningaasaliissutinut inatsisaagallartumut allannguutissatut siunnersuummik Naalackersuisunngortutut saqqummiussinissaat naatsorsuutigineqarsinnaavoq. Taamaattoqarpat tamanna Inatsisartut isummerfigisariaqarpat.

Maannamuugallartoq siunnersuutigineqassaaq ullormut oqaluuserisassatut agguanneqartoq tungavigalugu ataatsimiinneq ingerlanneqassasoq. Ullormut oqaluuserisassanut ukununnga uparuaassutinik oqaaseqartoqassagaluarpat Inatsisartut ullormut oqaluuserisassanut ataatsimiititaliarigallagaannik pilersitsisoqarnissaa isumagissavara.

Ullormut oqaluuserisassatut siunnersuutigineqartunut uparuaatissaqartoqarnerluni?

Palle Christiansen takassa.

Palle Christiansen, Demokraatit.

Soorlu ullormut oqaluuserisassani takuneqarsinnaasoq immikkoortoqarpoq matoqqasumik, tassani Demokraatininngaanniit uagut aamma-suunissaq politikkimik ingerlatsinermi siunnersuutigisimagatsigu, taamaattumik Siulittaasoqarfik qinnuigissavarput, immikkoortoq taanna aamma ammasumik suliarineqassasoq. Tassa kalaallit inuiaqatigiit pisinnaatitaaffeqarmata Inatsisartuni suut tamaviisa tusassallugit, taamaasilluni isertugassaqarnani ataatsimiititaliani siunnersuutitut il.il. ammasuunissaat Demokraatit kissaatigivaat.

Taamaangippat nassuiaqquneqarpoq, sooq matoqqasumik suliarineqassanersoq.

Jonathan Motzfeldt, (Inatsisartut sivisunerpaamik ilaasortaasimasunit angajulleq)

Allamik oqaasissaqartoqarnerluni?

Taamaangilaq.

Tassa Inatsisartut suleriaasertik sukkulluunniit allanngortissinnaavaat, aamma maannakkut Inatsisartut nutaat suleriaasertik misissorsinnaavaat, tassanilu aamma suleriaatsiminni ippigisatik taanna aqqutigalugu allannguutissaannik siunnersuuteqarsinnaallutik. Taamaattumik ippinnartoqarpat tassani suleriaaserlu malillugu maannakkut piareersarsimammat, taava siunnersuutitut allannguutissamik taama-ittumik siunnersuummik Demokraatit saqqummiussisinnaanermut periarfissaqarput.

Allamik oqaaseqarusuttoqarpa?

Taamaangippat naatsorsuutigaara taamatut ullormut oqaluuserisassat inissinneqarnerat maani inimi akuersaarneqartoq. Taamaappa?

Qujanaq.

Ulloq ataatsimiiffik siulleq, sisamangorneq 1. december 2005, nal. 11:20

Ullormut oqaluuserisassani immikkoortoq 3

Qinersineq pillugu nassuiaat.

(Inatsisartuni sivisunerpaamik ilaasortaasimasunit angajulleq).

Ataatsimiinnermik aqutsisoq: Jonathan Motzfeldt, Inatsisartut Siulittaasuat, Siumut.

Jonathan Motzfeldt, Inatsisartut Siulittaasuat, Siumut.

Taava qinersineq pillugu nassuiaat aamma saqqummiutissavara. Kalaallit Nunaanni Inatsisartunut qinersisarneq pillugu, Inatsisartut inatsisaa nr. 9 31. oktobar 1996-imeersoq, kingusinnerusukkullu allanguuteqartinneqartoq naapertorlugu Inatsisartuni ilaasortaq ukiuni sisamani ilaasortaasussatut qinigaasarput.

Qinigaaffik ullormit qinersiffimmit naatsorsuunneqartarpoq. Qinersinermut ataatsimiinnissaq qinersinermut allattaavimmut immersuussaaq tassani taaneqarsimassallutik kikkut qinigaasimanersut. Soorlutaaq qinersinermut atatillugu pisimasut erseqqissumik nassuiaatigineqassasut.

Qinersinerup kingorna qinersinermut siulersuisut qinersinermut atortumik Qinersinermut Ataatsimiititaliamut nassiussisarput. Qinersinermut atortut taakkua suli tiguneqarsimangillat, taamaattumillu Qinersinermut Allattaaviugallartoq nassiunneqarpoq.

Qinersinermi atortut tiguneqariarpata Qinersinermut Ataatsimiititaliap Qinersisarnermut inatsimmi § 44 naapertorlugu qinersineq inaarutaasumik akuersissutigissavaa.

Qinersinermut Ataatsimiititaliap Inatsisartunut ilisimatitsissutitut nassiutissavaa Qinersinermut Allattaavik immersorsimasani sinniisussanik nalunaarsuiffik ilanngullugu.

Qinersinermut Ataatsimiititaliap aalajangiineri allanngortinneqarsinnaangillat.

Qinersinermut Allattaavik ilisimatitsissutitut agguaanneqarpoq.

Qinersinermi Allattaavimmi Inatsisartutut ilaasortat qinigaasut, taakkulu sinniisussatut nalunaarsukkat innersuussutigaakka, matumalu kingorna ullormut oqaluuserisassaq taanna naammassineqartutut aamma maani isigissavara.

Qujanaq.

Ulloq ataatsimiiffik siulleq, sisamangorneq 1. december 2005, nal. 11:25

Ullormut oqaluuserisassani immikkoortoq 4

Ilaasortatut qinigaasut akuersissutigineqarnissaannik Qinersinerup Misilinneqaarnissaanut Ataatsimiititaliap inaasuteqaataa.

(Qinigaanerup Misilinneqaarnissaanut Ataatsimiititaliaq)

Ataatsimiinnermik aqutsisoq: Jonathan Motzfeldt, Inatsisartut Siulittaasuat, Siumut.

Jonathan Motzfeldt, Inatsisartut Siulittaasuat, Siumut.

Taava maannakkut tikipparput Qinigaanerup Misilinneqaarnissaanut Ataatsimiititaliap ilaasortat qinigaasut qinigaasinnaassusiat pillugu inassuteqaataa.

Inatsisartut Suleriaasianni § 1, immikkoortoq 3 aamma takoqquneqassaaq § 7, immikkoortoq 2 naapertorlugu qinigaanerup misilinneqaarnissaanut ataatsimiititaliaagallartumik Inatsisartuni sivisunerpaamik ilaasortaasimasumik siulittaasoqartumik, taassumalu toqqagaanik Inatsisartunik ilaasortanik sisamanik ilaasortalimmik Inatsisartut pilersitsissapput.

Uanga nammineq sivisunerpaamik ilaasortaasimasutut ilaanerma saniatigut, ataatsimiititaliami Inatsisartuni ilaasortat uku ilaasortaapput:

Hans Enoksen, Siumut

Josef Motzfeldt, Inuit Ataqatigiit

Finn Karlsen, Atassut

Per Berthelsen, Demokraatit

Inatsisartuni ilaasortatut qinigaasut tamaasa pinerluuteqarsimasunik nalunaarsuiffiup nuutinneqarnera tunngavigalugu qinigaasinnaanerat ataatsimiititaliap misissorpaa, takuuk Suleriaatsimi § 2 najoqqutaralugu.

Misissuineq ilaasortap arlaannaataluunniit qinigaasinnaaneranik nalornissutiginninnissamik pissutissaqalersitsinngilaq, taamaammat qinigaasinnaaneq pillugu inatsimmi piumasaqaatinut ilaasortat tamakkerlutik eqquutitsisutut isigineqassasut ataatsimiititaliaq inassuteqarpoq.

Tamanna naatsorsuutigaara akuersaarneqassasoq.

Akerliusoqarnerluni?

Naamik.

Taamaalilluni ullormut oqaluuserisassani immikkoortut sisamaat naammassillugu oqaluuserineqarpoq.

Ulloq ataatsimiiffik siulleg, sisamangorneq 1. december 2005, nal. 11:30

Ullormut oqaluuserisassani immikkoortoq 6

Inatsisartut Siulittaasussaannik qinersineq.

(Inatsisartuni sivisunerpaamik ilaasortaasimasunit angajulleq)

Ataatsimiinnermik aqutsisoq: Jonathan Motzfeldt (Inatsisartuni sivisunerpaamik ilaasortaasimasunit angajulleq).

Jonathan Motzfeldt (Inatsisartuni sivisunerpaamik ilaasortaasimasunit angajulleq).
Maanna tikkiparput Inatsisartut Siulittaasussaannik qinersineq.

Inatsisartut suleriaasianni § 3 naapertorlugu Inatsisartut ilaasortami akornannit Inatsisartut Siulittaasuannik siulittaasup tulliinik sisamanik inissitsiterluni ataatsimiinnermi qinersissapput.

Ullormut oqaluuserisassani immikkoortut arfernanni Inatsisartut Siulittaasussaannik qinersinissamut killippugut. Taamaammatt Inatsisartut Siulittaasuattut atuuffimmut qinigassanngortitsisoqarnissaa qinnutigissavara.

Agnethe Davidsen, Siumut

Agnethe Davidsen, Siumut oqaaseqartartuat.

Siumup Inatsisartuni gruppiata matumuuna Inatsisartut Siulittaasussaattut siunnersuutiginiarpaa sivisunerpaamik nunatsinni Inatsisartuni ilaasortaasimasooq taamatullu qinigaaffimmi kingullermi Inatsisartut Siulittaasorisimasaat Hr. Jonathan Motzfeldt, Inatsisartut Siulittaasuat, Siumut.

Jonathan Motzfeldt (Inatsisartuni sivisunerpaamik ilaasortaasimasunit angajulleq).

Tulliuppoq Agathe Fontain, Inuit Ataqtigiit.

Agathe Fontain, Inuit Ataqtigiit oqaaseqartartuat.

Inuit Ataqtigiinninngaanniik Jonathan Motzfeldt Inatsisartut Siulittaasussaattut akuersissuteqarfigissallugu nalunaarutigissavarput

Jonathan Motzfeldt (Inatsisartuni sivisunerpaamik ilaasortaasimasunit angajulleq).

Tulliuppoq Augusta Salling, Atassut.

Augusta Salling, Atassut oqaaseqartartuat.

Qujanaq.

Atassumminngaanniit siunnersuutigineqartoq Hr. Jonathan Motzfeldt taaseqataaffigissallugu nalunaarutigaarput.

Qujanaq.

Jonathan Motzfeldt (Inatsisartut sivisunerpaamik ilaasortaasimasunit angajulleq).

Tulliuppoq Anthon Frederiksen, Kattusseqtigiit Partiiat.

Anthon Frederiksen, Kattusseqtigiit Partiiat.

Siullermik Kattusseqtigiit Partiiat sinnerlugu tikilluaqqusaaninnut uummammik pisumik qujavunga. Massakkullu siulittaasussamik tullissanillu toqqartuiniarnerni Kattusseqtigiit Partiiat sinnerlugu annerusumik oqaaseqarnanga siunnersuutigineqartoq taperserlugu, naatsorsuutigilluinnarlugulu pisarnertut Inatsisartut naligiimmik sullinneqarnissaat ingerlanneqassasoq taaseqataajumaarpunga.

Jonathan Motzfeldt (Inatsisartuni sivisunerpaamik ilaasortaasimasunit angajulleq).

Allamik oqaaseqartorarusunnerluni?

Taamaangilaq.

Taamaasilluta taasissutigissavarput, Siumumit, Inuit Ataqtigiinnit, Atassummit Kattusseqtigiillu Partiiannit Jonathan Motzfeldt Inatsisartut Siulittaasussaattut qinerneqassasoq.

Tamatumunnga isumaqataasut qinnuigaakka nikueqqullugit.

24-t.

Akerliusut qinnuigaakka nikueqqullugit.

Soqanngilaq.

Taaseqataanngitsut qinnuigissavakka nikueqqullugit.

Arfinillit taaseqataanngillat.

Taamaalillunga qinerneqarnera Inatsisartunit amerlanerusunit nuannaarutigaaara, aammalu oqaatigissavara suleqatigiinnerput pitsaasumik ingerlasoq, aamma neriukkama taamaasillunga suleqataaffigissallugu.

Soorunami Inatsisartunut tamanut siulittaasutut sulinissara aamma qularutigineqassanngilaq, tamanna oqaatigissavara aamma taaseqataanngikkaluartunut misigisimassagamik aamma Inatsisartunut tamanut, tamassinnut taamaasillunga siulittaasuujumaarlunga.

Qujanaq tatiginninnermut, suleqatiginninnissarput qilanaaraarput.

Taava maannakkut tikipparput Inatsisartut Siulittaasuata tullianik siullermik, aappaanik, pingajuanik, sisamaannik kiisalu Inatsisartut Siulittaasoqarfianni sinniisussanik qinersineq.

Ulloq ataatsimiiffik siulleg, sisamangorneq 1. december 2005, nal. 11:35

Oqaluuserisassani immikkoortoq 7

Inatsisartut Siulittaasuata tullianik siullermik, aappaanik, pingajuanik, sisamaannik kiisalu

Inatsisartut Siulittaasoqarfianni sinniisussanik qinersineq.

(Inatsisartuni sivisunerpaamik ilaasortaasimasunit angajulleq)

Ataatsimiinnermik aqutsisoq: Jonathan Motzfeldt, Inatsisartut Siulittaasuata, Siumut.

Jonathan Motzfeldt, Inatsisartut Siulittaasuata, Siumut.

Inatsisartut Suleriaasianni § 3 naapertorlugu maanna siulittaasup tulliiinik sisamanik, Inatsisartut Siulittaasuata peqatigalugu Inatsisartuni Siulittaasoqarfiussanik qinersissaagut.

Siulittaasup tulliiinik qinersineq pissaaq agguaqatigiissitsilluni qinerseriaaseq (d'Hondtip periusia, takuuk § 27, imm. 1) atorlugu.

(Partiit aamma/imaluunniit kattusseqatigiit akornanni siulittaasup tulliiinik qinersinermi taaseqatigiittarnissamik isumaqatigiissuteqartoqarsimappat tamanna maannakkut ilisimatitsissutigineqassaaq).

Oqaatigineqassaaq Inatsisartut Siulittaasuata inissaq ataaseq siulleg partiip pissarsiarisassaa, taaseqatigiittarnissamilluunniit isumaqatigiissuteqartut pissarsiarisassaat, Siulittaasup pissarsiarisammagu.

Maannalu Inatsisartut Siulittaasoqarfianni siulittaasut tulliiisa atuuffissaannut qinigassanngortitat sinniisussallu nalunaarutigineqarnissaat qinnutigissavara.

Agnethe Davidsen, Siumut

Agnethe Davidsen, Siumut.

Siumup Inatsisartuni gruppiata Inatsisartut Siulittaasoqarfianut Jonathan Motzfeldtip saniatigut Fru Ruth Heilmann, Siumut, ilaasortassatsitut innersuupparput.

Jonathan Motzfeldt, Inatsisartut Siulittaasuat, Siumut.

Taava tulliuippoq Kuupik Kleist, Inuit Ataqatigiit.

Kuupik Kleist, Inuit Ataqatigiit oqaaseqartartuat.

Inuit Ataqatigiinninngaanniit Siulittaasoqarfimmut ilaasortassatsitut Agathe Fontain innersuupparput, Ane Hansenilu tassunga sinniisussatut.

Jonathan Motzfeldt, Inatsisartut Siulittaasuat, Siumut.

Tulliuippoq Ellen Christoffersen, Atassut.

Ellen Christoffersen, Atassutip oqaaseqartartuat.

Atassut sinnerlugu Inatsisartut Siulittaasoqarfiani ilaasortassatut toqqarparput Augusta Salling, sinniisussatut Ellen Christoffersen.

Qujanaq.

Jonathan Motzfeldt, Inatsisartut Siulittaasuat, Siumut.

Tulliulluni oqaaseqassaaq Lene Knüppel, Demokraatit.

Lene Knüppel, Demokraatit oqaaseqartartuat.

Demokraatit sinnerlugit toqqarusupparput Per Berthelsen, Astrid Fleischer Rex sinniisussatut.

Jonathan Motzfeldt, (Inatsisartut sivisunerpaamik ilaasortaasimasunit angajulleq)

Agnethe Davidsen, Siumut

Agnethe Davidsen, Siumut oqaaseqartartuat.

Tassa oqaatigissavara Siumut gruppianinngaanniit sinniisussatut Hr. Vittus Mikaelson, toqqaratsigu.

Jonathan Motzfeldt, (Inatsisartut sivisunerpaamik ilaasortaasimasunit angajulleq)

Taava tassa maannamut imatut nalunaartoqarpoq:

Siulittaasup tullia siulleq Agathe Fontain, Inuit Ataqatigiit, sinniisussaralugu Ane Hansen.

Siulittaasup tulliaata aappaa Augusta Salling, Atassut, sinniisussaralugu Ellen Christoffersen.

Siulittaasup tulliaata pingajuat Per Berthelsen, Demokraatit, sinniisussaralugu Astrid Fleischer Rex.

Siulittaasup tulliaata sisamaat Ruth Heilmann, Siumut, sinniisussaralugu Vittus Mikaelson.

Aamma uannut, Jonathan Motzfeldtimut, sinniisussatut toqqarneqarsimasoq Kim Kielsen ilanngullugu akuerineqarpoq.

Siulittaasup tullit qinigaasut tamaasa pilluaqqakka aammalu neriullunga pisarnitsitut suleqatigiilluarumaartugut.

Taamaasillutalu aamma Inatsisartut ataatsimiinneri qularnanngilaq ulapaarfiusussanngormata, minnerunngitsumik ukioq tullituttoq aggersoq. Siunnersuutit najoqqutaralugit ukiuunerani aamma upernaajunerani ataatsimiinnissaq pilersaarusiorneqarmata. Tassa sivisuumik ataatsimiittarnissaq qularutissaanngilaq naammassiniarneqarumaartut. Taamaasilluta maani Suliulittaasumut tullinngortut tamaasa pilluaqqoqqippakka. Taamaasillunilu oqaluuserisassaq taanna naammassivoq.

Maanna tikipparput Naalackersuisut Siulittaasusaaannik qinersinissaq.

Taanna pisinnagu oqaatigissavara Kalaallit Nunaanni Inatsisartuni Siulittaasunngorninni ullormut oqaluuserisassani immikkoortoq 8 inatsit, Naalackersuisut Siulittaasusaaannik qinersinermut tunngasoq aallarniutigalugu maannakut tigusinnaagakku aamma nuannaarutigigiga.

Atuuffimmut tassunga ataqqinartumut tatigineqarlunga toqqarneqarnera qujassutigereerpara aammalu taanna maanna oqaatigeqqissavara. Aammalu oqaatigaara Inatsisartut Naalackersuisunngulersullu anguniagaqarfiusumi pingaarutilimmillu sulinissaanik neriutigininnera naatsorsuutiginninneralu Siulittaasooq Siulittaasooqarfik sinnerlugu aamma oqaatigerusukkiga.

Maanna Ullormut Oqaluuserisassani Immikkoortoq 8 Naalackersuisut Siulittaasusaaannik qinersineq oqaluuserisavarput. Inatsisartut Suleriaasianni § 5 Immikkoortoq 2 naapertorlugu

Naalakkersuisut Siulittaasuat Inatsisartut ilaasortaasa akornannit amerlanerussuteqarluarnikkut qinerneqartussaavoq.

Maannalu Inatsisartut kaammattorumavakka Naalakkersuisut Siulittaasuattut qinigassanngortitsillutik siunnersuuteqaqqullugit.
Agnethe Davidsen, Siumup gruppiani siulittaasoq.

Agnethe Davidsen, Siumut oqaaseqartartuat.

Siumup inatsisartuni gruppiata matumuuna Naalakkersuisut Siulittaasussaatut siunnersuutigaarput qinigaaffimmi kingullermi Naalakkersuisut Siulittaasorisimasaat Hr. Hans Enoksen, Siumut.

Jonathan Motzfeldt, Inatsisartut Siulittaasuat, Siumut.

Tulliuppoq Agathe Fontain, Inuit Ataqtigiit.

Agathe Fontain, Inuit Ataqtigiit oqaaseqartartuat.

Inuit Ataqtigiinninngaanniik Hans Enoksen Naalakkersuisut Siulittaasussaatut taaseqataaffigissallugu nalunaarutigissavarput.

Jonathan Motzfeldt, Inatsisartut Siulittaasuat, Siumut.

Tulliuppoq Augusta Salling, Atassut.

Augusta Salling, Atassutip oqaaseqartartuat.

Qujanaq. Atassutip Inatsisartuni gruppianinngaanniit Naalakkersuisooqtigiinnissamik isumaqtigiissuteqarnissaq tunngavigalugu Hr. Hans Enoksen Naalakkersuisut Siulittaasussaatut taaseqataaffigissavarput.

Jonathan Motzfeldt, Inatsisartut Siulittaasuat, Siumut.

Allamik oqaaseqartussamik nalunaartoqarsimangilaq. Anthon Frederiksen, Kattusseqatigiit.

Anthon Frederiksen, Kattusseqatigiit oqaaseqartuat.

Ataqqinartut Inatsisartut. Ilumullimi Kattusseqatigiit Partiiat siunnersuutissaqaraluarpat aammalu amerlanerusunik peqateqarsinnaaguma uannut siunnersuutigissagaluarpunga, kisianni soorunami

taamaattoq qinersisartut, aammalu qinersinerup inernera ataqqivakka aamma siunnersuutigineqartoq partiinit amerlanerpaanit siunnersuutigineqartoq taperserlugu taasiumaarpunga.

Jonathan Motzfeldt, Inatsisartut Siulittaasuat, Siumut.

Allanik oqaaseqartoqarumangimmat taava maannamut siunnersuutigineqarpoq Hans Enoksen Siumut Naalakkersuisut Siulittaasuatut qinerneqassasoq.

Tamatumunnga isumaqataasut qinnuigissavakka nikueqqullugit.

24-it.

Akerliusut qinnugissavakka nikueqqullugit.

Soqanngilaq.

Taaseqataanningsut qinnuigissavakka nikueqqullugit.

Arfinillit taaseqataannigillat.

Taamaasilluni Hans Enoksen Inatsisartuni 24-inik qinerneqarluni maani qinigaavoq.

Naalakkersuisut Siulittaasussaat pilluarit.

Taava maannakkut tikipparput Immikkoortoq 9 Naalakkersuisunik qinersineq.

Matumuuna Naalakkersuisut Siulittaasua qinnuigissavara Naalakkersuisunut ilaasortanik qinersinissamut inassuteqaatini saqqummiuteqqullugit, tassa Suleriaatsimi §5 imm. 3 naapertorlugu Naalakkersuisut Siulittaasuata inassuteqaatai ataatsimoortillugit, ataatsimoorlugit taasissutigineqassapput.

Naalakkersuisut Siulittaasuat.

Hans Enoksen, Naalakkersuisut Siulittaasuat

Siullermik Inatsisartut Siulittaasuat, Jonathan Motzfeldt Inatsisarnut Siulittaasutut qinigaqqinninni qamanga pisumik pilluaqquakkit.

Inatsisartut Siulittaasutut ataqqineqarluarnerit qinigaqqinnivit takutippaa. Ataqqinqarnerit Inatsisartut Inatsisartuni ilaasortanik innuttaasunillumi kalaallinut qallunaanut maanilu allanut najugaqartunut tamanut iluaqqutaasumik sulinissat qularinngilara naammassilluassagit.”

Aammattaaq Inatsisartut Siulittaasoqarfianni ilaasortat nutaat pilluaqqorusuppakka. Neriutigaara Inatsisartut Naalakkersuisullu akornanni pitsaasumik suleqatigiilluarnissarput.

Naalakkersuisuni Siulittaasutut pingaartissavara Naalakkersuisut Inatsisartut Siulittaasoqarfiata aammalu Inatsisartuni ilaasortat ataatsimiititaliallu akornanni amerlanerusunik

peqataaffigineqartumik qanimut minnerunngitsumillu aamma inuiaqatigiit peqatigalugit ataqqillugillu, ataqeqatigiinneq aallaavigalugu suleqatigiinnissarput.

Ilanngullugu qujassutigissavara Naalakkersuisut Siulittaasuattut qinigaanera. Inatsisartut Naalakkersuisullu pillugit Inatsisartut inatsisaanni § 3 imm. 4 naapertorlugu Naalakkersuisut ilaasortassat ataatsimoorlugit taasissutigineqartussat innersuussutigissavakka.

Naalakkersuisunullu ilaasortassatut uku qinerneqarnissaat Inatsisartunut qinnutigaaara. Aningaasanut Nunanullu allanut Naalakkersuisutut inassutigissava Josef Motzfeldt, Inuit Ataqatigiit.

Suliassaqarfinnut ilaapput; missingersuuserineq, kukkunersiuineq aamma naatsorsuuserineq. Aammattaaq akileraartarneq akitsuusiisarnerlu isumaqatigiinniartarnerit assigisaallu, kiisalu nunanut allanut tunngassuteqartut.

Aalisarnermut Piniarnermullu Naalakkersuisutut inassutigissavara Finn Karlsen, Atassut. Suliassaqarfinnut ilaapput; isumalluutit uumassusillit aalisarneq piniarnerlu.

Inuussutissarsiornermut, Nunalerinerneq Suliffeqarnermullu Naalakkersuisutut inassutigissavara Siverth K. Heilmann. Suliassaqarfinnut ilaapput; inuussutissarsiuutit nunalerineq, suliffissuaqarneq, inuussutissalerineq, niiverneq, pilersuineq, nukissiorneq aamma innaallagissamik pilersuineq. Sermeq aamma Imeq suliffeqarneq takornariaqarnerlu.

Ineqarnermut, Attaveqarnermut Aatitassanullu Naalakkersuitut inassutigissavara Jørgen Wæver Johansen, Siumut. Suliassaqarfinnut ilaapput: angallannerneq tunngasut, mittarfeqarneq nalunaarasuartaateqarneq, ineqarneq, sanaartorneq kiisalu aatitassanut tunngasut.

Kultureqarnermut, Ilinniartitaanermeq, Ilisimatusarnermeq Ilageeqarnermullu Naalakkersuisutut inassutigissavara Doris Jakobsen, Siumut. Suliassaqarfinnut ilaapput; meeqqat atuarfii inuussutissarsiornermut, annertusisanillu ilinniartitaanerit, ulluunerani paaqqinnittarfiit, ilisimatusarneq, sunngiffimmi sammisassaqtitsitsineq, timersorneq, kulturimut tunngassuteqartut, oqaatsimut politikki, højskoleqarneq kiisalu ilaageeqarneq.

Ilaqutariinnermut Inatsisinillu Naalakkersuisutut inassutigissavara Aleqa Hammond, Siumut.

Suliassaqarfinnut ilaapput; inunnik isumaginninneq aamma inatsiseqarnermut tunngasut.

Peqqissutsimut Avatangiisinut Pinngortitamullu Naalakkersuisutut inassutigissavara Asii Chemnitz Narup, Inuit Ataqtigiit. Suliassaqarfinnut ilaapput; peqqissaaveqarfik, pinaveersaartitsineq avatangiisinik aamma pinngortitamik illersuineq kiisalu Misissueqqaarnerit aamma Asiaq ilanngullugu.

Taamatut oqaaseqarlunga Naalakkersuisuni ilaasortassatut Josef Motzfeldt, Finn Karlsen, Siverth K. Heilmann, Jørgen Wæver Johansen, Aleqa Hammond, Doris Jakobsen aamma Asii Chemnitz Narup Inatsisartunut inassutigaakka akuereqqullugit.

Qujanaq.

Jonathan Motzfeldt, Inatsisartut Siulittaasuat, Siumut.

Siunnersuutigineqartunut akerliulluni oqaaseqartoqarumanerluni.

Ja, oqaaseqarumallutik nalunaarsimapput maannamut akerliusunik taanngikkaluarpakka kisianni oqaaseqarumasut Kuupik Kleist, Inuit Ataqtigiit.

Kuupik Kleist, Inuit Ataqtigiit oqaaseqartartuat.

Siullermik erseqqissaatigissavara Inuit Ataqtigiinniit Naalakkersuisut Siulittaasunngortup qinigaaninnik pilluarit. Inassuteqaatai Naalakkersuisussamitut tamakkiisumik uagut Inuit Ataqtigiinniit akuersaaratsigit taaseqataasagatta soorunalimi.

Periarfissaq manna iluatsillugu taassuma saniatigut Inuit Ataqtigiit sinnerlugit imatut oqaaseqalaarusuppunga.

Qinersineq naammassereerpoq sulinissarpullu aallartippoq. Qujageqqusaarnerup ullui qaangiupput aamma pissusilersuutit qineqqusaarnermut taammaallaat naleqqussorinartut atorneqarnerat tamaangga killeqarpoq.

Qinigaasut tamaasa Inuit Ataqtigiit sinnerlugit pilluaqqorusuppakka, minnerunngitsumillu qinigaarlaat ilaat inuusuttunnguit sulilluarnissaannik neriuffigeqisavut aammalu uatsinnit taarsiiumaartussatut neriuteqarfisavut.

Qinersisartut qinikkaminnut suliakkiissutaat tassaasoq nunatta siunissa pitsaasooqqullugu qaamasooqqullugulu suleqatigeeqqulluta, tassaavoq suliassaq saneqqunneqarsinnaanngitsoq

ataasiakkaarluta soqutigisatsinnit pingaernerusoq. Immitsinnut pingaartorsiutigineramik pingaernerujussusoq partiinulluunniit ilaasortaaffigisatsinnut ataqqinernerullunilu pisussaaffiliinerusoq.

Oqaatsit ataatsimoorneq patajaassuseq nutarterinerlu qineqqusaarnermi partiit arlariulluta qulequtarisimavagut.

Ukiunilu tulliuuttuni oqaatsinik taakkuninnga timitaliinissamut qinersisartunit pisussaaffilerneqarpugut.

Ataatsimoorneq tassaassaaq ukiuni tulliuuttuni nalaatassatsinni ilaatigut sakkortusinnaasartussani nukissarput, inuiaqatigiinni sukkasuumik naleqqussariartortuni malunnartumillu allangoriartorfiusuni ataatsimoorneq, ataatsimoorneq avissaartuukkutta nukillaariartussaagut - suliaassarpassuatsinnut aqqissuutassarpassuatsinnullu nukissavut atorfissaqarteqaavut, immitsinnut pinnaaterusaarnissatsinnut nukissaqanngilagut.

Ukiuni kingullerni naalackersuinikkut aalassassimaarnerput tupinnangitsumik patajaannerusumik ingerlatsisoqarnissaannik piumasaqarnermik kinguneqarpoq, tamannalu qinersisartut novemberip 15-iani taasinermikkersikkut ersersikkaat Inuit Ataqaqatigiinni paasivarput. Aamma upperaaput nutarterinaraanni nutarterineq ilumoortoq aatsaat pisinnaasoq patajaatsunik tunngaveqaraanni tapersersuisunillu tunuliaqutaqaraanni.

Tamannarpiarlut Inuit Ataqaqatigiit qinersinerup kingorna Naalackersuisunngortitsitsiniarnermut akulerunnerannut pissutaavoq.

Siullermeerutaasumik Siumup peqataaffiginngisaanik naalackersuisunngortitsisinnaaneq piviusorsiuunngitsoq sukkasuumik paasivarput, aamma takuarput Atassut Siumullu erngertumik naalackersuisunngortitseqatigiinniarlutik isumaqatigiinnialersut.

Taamatullu pisut nalaanni Inuit Ataqaqatigiit siulersuisuunerisa piumasaqarfigaatigut isumaqatigiinniartunut akuleruteqqulluta naalackersuisunngortussat ilaasortamik ataasiinnarmik amerlanerussuteqartussat, amerlanerusunik tunuliaqutaqarniassammata minnerunngitsumillu Inuit

Ataqatigiit partiit inuiaqatigiinnik allanngoriartortitsinermut mikinngitsumik akisussaaqataagatta imaalitsiaannaq qimarratigisinnaanngisatsinnik.

Siunertat pingaernerit maani Inatsisartuni isumaqatigiissutaareerput taamaammat qinigaaffimmi ullumikkut aallartinneqartumik angusaqarfiusumik suleqatigiinnissarput Inuit Ataqatigiinniit neriulluarfigaarput.

Naalackersuisooqatigiilernissamik isumaqatiinniarnerni pisarnernit annertunerusumik pissarserusukkaanni aamma annerusumik pilliuteqartariaqarnermik malitseqassasoq isumaqatiinniartuni tamatta nalunngilarput.

Aamma isumaqatiginninniarnerni partiit isumaqatigiinniaqataaangikkaluartulluunniit isumaat qineqqusaarutaallu ilanngullugit eqqartortarpagut, iluatinnaataat sapinngisamik ilanngunniarsaralugit.

Taamaalilluta sulinissatsinnut tunngavissarissarluta misigisimavugut nunatsinni innuttaaqativut suleqatigalugit angusaqarnissarput qularinngilarput.

Neriorsuutigaarput Inuit Ataqatigiinni pisarnerput naapertorlugu suleqataalluarumaarluta, aamma ilissi taamassi sulilluarnissassinnik kissaappatsigit.

Jonathan Motzfeldt, Inatsisartut Siulittaasuat, Siumut.

Tulliulluni oqaaseqassaaq Augusta Salling, Atassut.

Augusta Salling, Atassut

Qujanaq. Aamma uagut Atassutip gruppianinngaanniit Inatsisartuni Siulittaasussatut qinerneqaqqittoq pilluaqqungaarparput neriuppugut aamma soorunami ukiuni tulliuttuni sisamani suleqatigiilluarumaartugut.

Aamma Naalackersuisut Siulittaasuatut qinerneqartoq pilluangaarit aammattaaq isumalluarpuqut ukiuni tulliuttuni sisamani suleqatigiinneq pitsaasoq ingerlassinnaajumaaripput.

Naalackersuisut Siulittaasuataasuaninngaanniit naalackersuisooqataasussatut siunnersuutigineqartut tamaasa ataatsimut isigalugit Atassumminngaanniit akuersaassavarput, aamma Atassumminngaanniit oqaatigissavarput ukiuni tulliuttuni sisamani Naalackersuisut sulinissaanni naatsorsuutigilluinnaratsigu Inatsisartut tunuliaqutaallutik inissisimasut taakku aamma

tusaaniarneqarlualutik suleqatigineqarumaartut. Tassami suleqatisiinneq pitsaasoq ingerlanneqassappat nunatta inuiaqatigiillu ingerlalluarnissaanik siunertaqartumik sulineq ingerlalluassappat, taava Inatsisartut aamma Naalackersuisuninngaanniit tusaalluarneqartariaqarput. Sulinerullu ingerlanera taamatut toqqammaveqassasoq naatsorsuutigilluinnaratsigu sulilluarnissassinnik kissaappassi suleqatigiilluarnissatsinnik neriulluta. Qujanaq.

Jonathan Motzfeldt, Inatsisartut Siulittaasuat, Siumut.

Qujanaq pilluaqqussutinnut Augusta Salling, Atassut.

Tulliuppoq Per Berthelsen, Demokraatit taanna pereerpat Anthon Frederiksen, Kattusseqatigiit.

Per Berthelsen, Demokraatit.

Uaguttaaq pinngitsoorumangilagut Inatsisartuni Siulittaasup qinigaaneranut aamma sungiusimasattut soorunami qiimallutalu suliniutissat siunnerfeqarluartut pitsaasumik suleqataffigalugit pissaagut.

Demokratit tungaaninngaanniit naatsumik makkua oqaatigissavakka. Tassa demokratit tungaaninngaanniit qinersisartut tatiginnillutik annertuumik siuariartitillutik qinersisimanerat tuppalliutigalugu qujassutigaarput, tamanna nukissaqartitsivoq demokratit patajaatsumik tatiginartumillu suleqqinnissaannut.

Demokratit tungaaninngaanniit neriutigaarput maanna naalackersuisooqatigiiliortut patajaatsumik ingerlasinnaajumaartut inuiaqatigiinnimi akisuallaaleqaaq sangujoraarnersuarmik ingerlaneq. Taamaattumik demokratit tungaaninngaanniit neriorsuutigisinnaasarpur tassa unaavoq: Inuiaqatigiinnit iluaqusiiniarluni siunnerfiit soorunami demokratit tungaanningaanniit pitsaasumik suleqataffigalugit ikorfartussagatsigit. Kisianni aamma demokratit tiungaaninngaanniit malunngilluinnarparput maanna inuiaqatigiinni torersumik aqutsinissamik ingerlatsinissamillu isornartorsiuisinnaassuseqartumik isiginnilluta oqariartuuteqarsinnaasut partiitut angisuutut kisiartaalluta tamanna tigummisarileratsigu.

Akisussaaffik taanna imaannaangitsoq nunatta toresumik ingerlanneqarneranik qulakkeerisussaq demokratit akuersaartumik ataqinassuseqartumik tiguaat, ilumoortumillu tamanna aallaavigalugu sullissinissaq piareersimaffigalugu.

Naalakkersuisunut siulittaasunngortoq soorunami aamma demokratit tungaaninngaanniit pilluaqqarput, kisianni tassa oqaatigissavarput, naak immaqa naalakkersuisussanik ataasiakkaanik toqqaaneq pisaraluarpat ilaatigut akuerseqataanerit pisinnaassagaluartut. Nunatsinni ajoraluartumik ataastimoortumik akuersinerit taakku pisarput taamaattumik demokratit naalakkersuisooqatigiiliornermi aammalu inuttalersuinermi peqataasinnaanikuunnginnamik misigisimangillat akuersillutilluunniit naaggaartuussallutik, taamaattumi isumaqarpugut demokratit tungaaninngaanniit torernerpaassasoq taaseqataanata taaseqataagutta. Qanoq oqaatigissassaanerpoq. Tassa qujanaq.

Jonathan Motzfeldt, Inatsisartut Siulittaasuat, Siumut.
Tulliuppoq Anthon Frderiksen, Kattusseqatigiit Partiiat.

Anthon Frederiksen, Kattusseqatigiit Partiiat.

Siullermik Kattusseqatigiit partiiat sinnerlugu Inatsisartunut siulittaasunngooqqittoq uummammit pisumik pilluaqqarput aammalu Naalakkersuisut siulittaasuattut ingerlaqqittoq Hans Enoksen aamma pilluaqqullugu kiisalu partiit Siumut, Inuit Ataatigiit Atassullu aamma isumaqatigiissinnaasimanissinnik aamma atsioqatigiissinnaanissinnillu naapeqatigiissinnaagassi isumalluartipatsigut.inuiaqatigiit sinnerluta tamatta.

Uagut Kattusseqatigiinni qinersisartut aalajangertarnerat ataqquuaannarparput aamma kikkulluunniit qinikkatut inissisimasut aamma tamaasa ataqqivagut. taamaattumik aamma siusinnerusukkulli manna oqaluttarfik atorlugu Kattusseqatigiit sinnerlugit kissaatigiuarsimavarput qinikkanik naalakkersuisoqartarnissaq. Avataaninngaanniit qinigaanngitsunik naalakkersuisoqartarneq taanna akerleriuannarsimavarput taamaattumik maannakkut takusinnaasagut naapertorlugit naalakkersuisunngortussat siunnersuutigineqartut tamarmik inuit qinigarivaat, tamannalu Kattusseqatigiinni assut nuannaarutigaarput taammatut aalajangersimannersi aaamma taqqillugu tigorussupparut. Taamaammat naatsorsuutigissavarsi aamma Kattusseqatigiit sinnerlugit naalakkersuisunngortitsiniarnermi akuersillunga taaseqataajumaartunga. Qujanaq.

Jonathan Motzfeldt, Inatsisartut Siulittaasuat, Siumut.

Taava maannakut taasinalissaagut. Naalackersuisut Siulittaasuata naalackersuisussat saqqummiussai aammalu suliassaqarfiit maannakut nalunaarutigereerpai. Taakkununga isumaqataasut qinnuigissavakka nikueqqullugit.

24-t

Jonathan Motzfeldt, Inatsisartut Siulittaasuat, Siumut.

24-t isumaqtaapput.

Akerliusoqarpa?

Naamik.

Taasinngitsoortoqarpa?

6 taaseqataanngillat.

Taamaalilluni naalackersuisunngortut amerlanerusunit, 24-nit, akuerineqarput, taakkulu aamma tamaasa pilluaqquagut sulqatiginissaannullu aamma qilanaarluta.

Oqaluuserisassaq qimatsinnagu Agnethe Davidsen, Siumut, oqaaseqarumavoq.

Agnethe Davidsen, Siumut.

Siullermik Siumup gruppia sinnerlugu Inatsisartut Siulittaasortaavat aammalu Naalackersuisut Siulittaasortaavat taamatullu aamma Naalackersuisunngortut qamannga pisumik pilluangaaritsi. Siumup gruppianiit neriorsuutigissavarput soorunami akisussaaffeqartumik ukiuni sisamani partiit aamma partiit suleqatigisagut peqatigalugit Inatsisartunilu ilaasortat tamaasa peqatigalugit suleqatigiilluarnissarput kissaatigigatsigu. Qilanaareqaarput aammalu ukiuni tullerni tatigeqatigiilluta tamatta akisussaaffeqarluta suleqatigiinnissatsinnut qilanaaqaagut. Tamassi pilluaritsi.

Jonathan Motzfeldt, Inatsisartut Siulittaasuat, Siumut.

Tulliulluni oqaaseqassaaq Naalackersuisuni Siulittaasuat.

Hans Enoksen, Naalackersuisut Siulittaasuat, Siumut.

Qujanaq.

Siullermik Naalkkersuisunut ilaasortannortut pilluaqquniarpakka aammalu assut nuannaarutigalugu partiit naalakkersuisooqatigiit amerlasuunik tunuliaqutallit massakut pilersinneqarmata, taamaalilluni pitsaasumik tunngavissalimmillu suleqatigiinnissaq inuiaqatigiit kissaatigisaat naammassineqarlunilu sapinngissamik pitsaanerpaamik angusaqarfiusumik suleqatigiinneq inge rlanneqartussanngormat.

Qineqqusaarneq qaangiuppoq. Qineqqusaarnermi ilaatigut oqaatsit sakkortuut partiit akunnerminni atortarsimasaat uniffiginagit nutaanik naalakkersuisulioREQ, suleqatigiinnermik pilersitsineq partiimi Siumup siuuttuatut assorujussuaq nuannaarutigalugulu tuppalliutigaara, neriuppunga aamma suleqatigiinneq pitsaasumik kingulimmilu inuiaqatigiinnut malunniuteqartumik ingerlanneqarumaartoq.

Inuiaqatigiit kissaatigaat pitsaasumik sullinneqarnissartik, pitsaasumik kiffartuunneqarnissartik tu saaneqarnissartillu, taamaammat neriutigaara Inatsisartunngortut nutaamik qinikkat ataqqinartut suleqataalluarumaartusi aamma neriorsuutigissavara naalakkersuisooqatigiit sapinngissamik amerlanerpaamik Inatsisartuni tunuliqutaqarlutik suulinissaat ingerlanneqassammat imaanngitsoq suleqatigiit kisiissa aallaavigalugit. Aamma soorumi paartiinik allannik maani peqataasoaqarpoq aamma taakkua inuppaassuarnik tunuliaqutaqarput tusaaneqarnissaat aamma pisussaaffigaarput naammassiniassallugu.

Taamatut oqaaseqarlunga qujavunga aammalu isumalluarfigaakka naalakkersuisunut ilaasaortannortut neriuppungalu innuttaasut ataqqinartumik pitsaasumillu kiffartuukkumaarisi aamma isumalluarfigineqarpusi taamak sulinissassinut.

Neriutigaar nunarput asarput pigisarput inuilu atajuassasut pitsaasumillu sullinneqarumaartut. Qujanarsuaq.

Jonathan Motzfeldt, Inatsisartut Siulittaasuat, Siumut.

Taamaalilluta oqaluuserisassaQ taanna naammassineqarpoq aamma siunnersuutigisasvara maannakut ataatsimiiinneq unikkallassasoq nangissasugullu nalunaaqutaq ataatsinut. Ataatsimiiinneq unikkallarpoq.

Nal. 13.00 ataatsimiinneq nangeqqinneqarpoq

Ataatsimiinnermi aqutsisoq: Jonathan Motzfeldt, Inatsisartut Siulittaasuat

Ataatimiinneq ingerlaqqippoq. Sivilaartumik sianerpunga qinnuigissagakkit Inatsisartunut ilaasortat issiavimminnut ingeqqullugit aallartinnitsinni aaamma taasissuteqartussaassagut taakkulu aamma akuersissutigineqareerpata ingerlaqqissalluta.

Tassa imaappoq ullumimiit naalackersuisutullu atuukkunnaarnissap tungaanut Inatsiartuni sulingiffeqarallarnissamik qinnuteqaatit naalackersuisunut qinigaarlaaniit ukunanga tiguneqarput: Aleqa Hammond Siumut, Doris Jakobsen Siumut, Jørgen Wæver Johansen Siumut, Asii Chemnitz Narup Inuit Ataqtigiit aamma Siverth K. Heilmann Atassut.

Taakkua taaneqartut sulingiffeqarallarnissamik qinnuteqaatit akuersissutigineqarnissaat inassutigineqarpoq. Apeqqutigissavara tamatumunnga akerliusoqarnersoq=

Taamaangilaq. Akuersissutigineqarpoq. Tamatuma malitsigisaanik sulingiffeqarallarnep atuunnerani naalackersuisunut qinigaarlaanut taartaasussatut sinniisussat uku aggersarneqarput: Tommy Marø Siumut, Otto Jeremiassen Siumut, Jens Lars Fleischer Siumut, Olga Poulsen Berthelsen Inuit Ataqtigiit aamma Kristian Jeremiassen Atassut. Taakku aggersarneqarsimapput sinniisussat. Sinniisussat qinigaasinnaanerat Qinigaanerup Misilinneqarnissaanut Ataatsimiititaliaagallartup misissorsimavaa qinigaasinnaanerat misissuineq nalornissutiginninnissamik pissutissaqalesitsinngilaq.

Sinniisussat taaneqartut Inatsisartuni ilanngunnissaat akuereneqassasoq inassutigineqarpoq. Tamanna akuerineqarpa? Akerliusoqarpa?

Naamik. Taamaalillunga qinnuigissavakka taaneqartut inissaminnut ingeqqullugit. Tommy Marø Siumut, Otto Jeremiassen Siumut, Jens Lars Fleischer Siumut, Olga Poulsen Berthelsen Inuit Ataqtigiit kiisalu Kristian Jeremiassen Atassut. Issiavissassinnut inginniaritsi tikilluaritsilu.

Ulloq ataatsimiiffik siulleg, sisamangorneq 1. december 2005 nal. 13.00

Oqaluuserisassani immikkoortoq 15

Inatsisartut Ombudsmandissaanik qinersineq.

(Inatsisit Atortinneqarnerannut Ataatsimiititaliaq)

Ataatsimiinnermik aqutsisoq: Jonathan Motzfeldt, Inatsisartut Siulittaasuat, Siumut.

Jonathan Motzfeldt, Inatsisartut Siulittaasuat, Siumut.

Taava maannakkut immikkortoq 15 tikissavarput tassalu Inatsisartut Ombudsmandissaanik qinersineq. Tassunga tunngatillugu oqaatigineqassaaq Inatsisartut inissitsiterlutik ataatsimiinneranni Inatsisartut Ombudsmanidiat toqqarneqartarmat.

Inatsisartut Inatsisit Atortinneqarnerannut Ataatsimiititaliaata nalunaarfigaanga Vera Leth toqqagaaqquittussatut ataatsimiititaliap inassutigigaa. Allanic siunnesuutissaqartoqarnesoq apeqqutigissavara. Taamaangilaq. Maanna taasissaagut.

Vera Lethip toqqarneqarnissaanut isumaqataasut qinnuigaakka nikueqqullugit.

29-t

Akerliusoqarpa?

Naamik

Taasinngitsoortoqarpa?

Naamik

Taamaalilluni Vera Leth Inatsisartut Ombudsmandissaattut qtoqqarneqarpoq. Vera Leth pilluarit aamma neriuppugut pisarnittut suleqatigiinnerput nuannesq ingerlaqqissasoq..

Ulloq ataatsimiiffik siulleq, sisamangorneq 1. december 2005 nal. 13.10

Oqaluuserisassani immikkoortoq 16

Inatsisartut Ombudsmandianut taartaasartussamik qinersineq.

(Inatsisit Atortinneqarnerannut Ataatsimiititaliaq)

Ataatsimiinnermik aqutsisoq: Jonathan Motzfeldt, Inatsisartut Siulittaasuat, Siumut.

Jonathan Motzfeldt, Inatsisartut Siulittaasuat, Siumut.

Maanna tikipparput immikkoortoq 16. Inatsisartut Ombudsmandianut taartaasartussamik qinersineq. Inatsisartut inatsisit Atortinneqarnerannut Ataatsimiititaliaata nalunaarfigaanga Hans Gammeltoft Hansen toqqagaaqqittussatut ataatsimiititalaip inassutigigaa. Toqqaanermi tunngaviussaaq hans gammeltoft Hansenip nammineerluni aammalu Folketingip Retsudvalgiata akuersinissaat. Tassalu Inatsisit Atortinneqarnerannut Ataatsimiititalip inassuteqaataa. Allamik siunnesuutissaqartoqarnerisooq apeqqutigissavara. Taamaanngilaq Maannalu taasissaagut Hans Gammeltoft Hansenip toqqarneqarnissaanut isumaqatassut nikueqqullugit

30-t

Akerliusoqarpa?

Naamik.

Taasinngitsoortoqarpa?

Naamik.

Taamaalillutalu Hans Gammeltoft Hansen toqqarneqarpoq. Taavalu toqqarnearnermut toqqammaviusut Hans Gammeltoft Hansenip aammalu Folketingip Retsudvalgiata akuersinissaat. Taamaalilluni oqaluuserisassaq taanna naammassivoq.

Ulloq ataatsimiiffik siulleq, sisamannorneq 1. december 2005 nal. 13.20

Oqaluuserisassani immikkoortoq 10

Aningaasat ukiuannut 2006-imut Inatsisartut aningaasaliissutitut inatsisigigallagaata allannguutissaanut Inatsisartut inatsisissaattut siunnersuut.

(Aningaasanut Nunanullu allanut Naalakkersuisoq)

Ataatsimiinnermik aqutsisoq: Jonathan Motzfeldt, Inatsisartut Siulittaasuat, Siumut.

Jonathan Motzfeldt, Inatsisartut Siulittaasuat, Siumut.

Taava immikkortoq 10 tassalu Aningaasat ukiuannut 2006-imu Inatsisartut aningaasaliissutitut inatsisigigallagaata allannguutissaanut Inatsisartut inatsisissaattut siunnersuut. Tassunga tunngatillugu oqaatigineqassaq immikkoortoq taanna 10 Aningaasat ukiuannut 2006-imut Inatsisartut aningaasaliissutitut inatsisigigallagaata allanngortinneqarneranik Inatsisartut inatsisissaattut siunnersuut maannakkut oqaluuserissagatsigu.

Oqaatigineqassaq Namminersornerullutik Oqartussat ingerlataasa innarlerneqaratik ingerlaqqissinnaanissaat inatsisikkut tassuuna tunngavissinneqassammat. Siunnersuut maanna inissitsiterluni ataatsimiinnermi akuersissutigineqarsinnaaqullugu inatsisissatut siunnersuutip siullermeerneqarnerata, aappassaaneernerat pinajussaaneerneratalu akornanni piffissaliussat saneqqunneqarnissaat pisariaqarpoq.

Piffissaliussat periaatsini §30-mi imm. 1-imi aamma § 31-mi 1-imi allassimapput., tamatumanilu suliarinninnerit ataasiakkaat ulluni pingasuni akunneqartarlutik ingerlanneqarnissaat piumasaqataalluni. Piffissaliussat taaneqartut immikkut illuinnartumik pisoqartillugu Inatsisartunit saneqqunneqarsinnaapput. Pissutsit taamaatsillugit piffissaliussat suleriaatsimi § 41 innersuussutigalugu Inatsisartunit saneqqunneqarnissaat inassutigineqarpoq. Piffissaliussat

saneqqunneqarneat akерlerineqanngippat tamanna akuersisstigineqartutu aamma isigissavara. Oqaaseqartoqarumanerluni. Per Berthelsen demokratit.

Per Berthelsen, Demokratit:

Qujanaq.

Uanga siullullunga apeqqutissaqarpunga aamma nalunngilara Lene Knüppel kingusinnerusukkut aamma apeqqutissaqartoq. Kommunit kattussuullugit allanngortiterinissamut atatillugu suleriaqqinnissamut atatillugu qinnutigineqarpoq imaluunniit siunnersuutigineqarpoq 200.000,00 koruunit kommuninut marlunnt avillugit tunniunneqassasut. Demokratit tungaaninngaanniit akunnattoorutigicarput unaavoq suliaasaq taanna nunatsinni Kommunit Kattuffianinngaanniit ingerlanneqartoq qallerlugu taamatut aningaasaliinissaq pissuissamisoortuunersoq, tassami suliaq KANUKOKA-p ataani ingerlammat, taamaattumillu aningaasaliisoqassappat Demokratit tungaaninngaanniit takorlooralaratsigu aningaasat KANUKOKA-minngaanniit taava ingerlanneqartussaassasut. Aamma nalunnginnatsigu kommunit allat aningaasaqarniarnikkut artorasartut taamaattumik taamatorpiaq kommunit marluk aalajangersimalluinnartumik toqqagaasut aningaasliiffiginiarnerat iluamik isummorsorluarluni nalilersuineq tunngavigalugu pisimanersoq tusarusupparput.

Tassa maannakkut akuersisutigigallassavarput piffissaliussat suleriaatsimi saneqqineqartut inassutigineqarnerat akuersissaarumaneqarnerasoq. Tamanna akuersaarneqapoq. Taamaalluni pisarnertut aapassaaneerinninnerup pingajusaaneerinnereernullu kingorna taasissaagut. Maannalu sinnersuutip siullermeerlugu oqaluuserineqartinnagu Naalackersuisut Siulittaasuat oqaaseqarumavoq.

Hans Enoksen, Naalackersuisut Siulittaasuat:

Qujanaq.

Tassaana qujassuteqarniarlunga. Utoqqatsisutigigaara uani siullermik oqalukkama ilanngutinngitsoorakkitt tassalu Naalackersuisunut ilaasortaasimasut massakkullu aamma tununartut Naalakesuisut Siulittaasuattut suleqatigisimanerani qutsaviginiarpakka piffissami imaannaanngitsumi taasinnaasanni aamma annertuumik tunuliaqutaasimanerat aamma assut qujassutigerusuppara taamaalluta ilaatigutajornartorsiutit annertuut qaangersinnaanngortarsimavagut ikioqatigiilluarnikkut. Uanilu qutsaviginiarpakka tassa piffissap

ilaani naalackersuisuusimasut Aalisarnermut, Ineqarnermut aammalu Namminersoermmut Isumaginninnermullu tassalu Simon Olsen, Jens Napätôq, Rasmus Frederiksen, Toimmy Marø, Jørgen Wæver Johansen. Qujaffiginiarpassi ilumoorlusi kiffa rtuusseqataagassi aamma neriuppunga sulii siunissami pitsaasumik inuiaqatigiinnut kiffartuussilluarumaartusi aamma isumalluarfigaassi.

Taavalu aamma piffissaq tamakkerlugu naalackersuisuusimasut massakut tunuartut tassalu Johan Lund Olsen aamma Henriette Rasmussen annertuumik qutsiviginiarpakka. Sulilluarsimaqaasi ikaarsaariarneq imaannaanngitsoq aqquusaarsimavarsi kisiannili ilumoorlusi naalackersuinikkut anguniakkat aamma tunnaartarineqartut tunuliaqutarisimavasi ilaatigut aamma nammineq inuttut annertuumik pilliuteqartarlusi. Aammalu ilaqutaat qutsivigierusuppakka, taakkupput aamma annertooujussuarmik eqqorneqartartut. Naalackersuinikkut sulineq imaanngilaq politikkerimut kisimi tunngatinneqartartoq aamma ilaqutaat annertuumik kalluarneqartarmata ilaqutaasut qutsivigierusuppakka tunuliaqutaalluarsimammata ilaquttaminnut aammalu inuiaqatigiinni sullissineranni peqataanerannut.

Neriuppunga siunissami inuiaqatigiinni suleqataalluarumaartusi aamma qularinngilara piuumassuseqartusi suleqataanissassinnut minnerunngitsumillu aamma misilittakkasi sulii atorfissaqarteqaagut aammalu qularinngilara ataatsimiititaliani massakut inissittussat annertuumik tunuliaqutaalluarumaartusi misilittakkasi tunngavigalugit. Qujanarsuaq kiffartuussisimanissannut ilaatigut inuttut oqitsuinnaanngitsunik atugaqartaqaraluarlusi politikikkut nalaattakkavut tunngavigalugit qujavunga kiffartuussisimanissinnut.

Jonathan Motzfeldt, Inatsisartut Siulittaasuut, Siumut.

Qujanaq.

Taava maannakkut Aningaasat ukiuannut 2006-imut Inatsisartut aningaasaliissutinut inatsisigigallagaata allannguutissaanut Inatsisartut inatsisissaattut siunnersuut aningaasanut Naalackersuiso saqqummiutissavaa.

Josef Motzfeldt, Aningaasanut Nunanullu allanut Naalackersuisoq.

Matumuuna naalackersuisut sinnerlugit saqqummiutissavara aningaasat ukiuannut 2006-imut inatsisartut aningaasaliissutinut inatsisigigallagaannut allannguutissatut inatsisartut inatsisissaattut Naalackersuisut siunnersuutaat.

15. november 2005-imi inatsisartunut qinersisoqartussanngormat taamanikkut inatsisartuusimasut 2006-imut aningaasanut inatsisissaq suliarisimannigilaat. Taamaattumik inatsisartuusimasut inatsisartut aningaasaliissutinut inatsisigigallagassaat akuerisimavaat.

Naalackersuisut siunniuppaat 2006-imi inatsisartut ataatsimeeqqaarneranni 2006-imut aningaasat inatsisissaattut siunnersuut saqqummiutissallugu. Kisiannili aningaasaliissutit ilaat inatsisartut upernaamut inatsisartut aningaasat inatsisaannut aalajangiinissaannut utaqqisinneqarsinnaanngillat. Naalackersuisut siunnersuutigaat siunertanut ikittunut immikkorluinnaq ittunut maannangaq aningaasanik immikkoortitsisariaqartugut inuiaqatigiit aningaasaqarnerat eqqarsaatigalugu.

Inatsisartut 2006-imut aningaasat inatsisissaat upernaaru suliarilerpassuk 2006-imi pingaarner-siulluni tullerriaarineq tamakkiisumik isummerfigisariaqarparput. Aningaasat tamakkiisumik atsikkutigiissumillu tullerriaarnerat aningaasanut inatsisitsinni tunngavippiaavoq pingaarutilik. Aamma nalunaarutigisinnaavara naalackersuisut decembarimi januarillu aallartisimalernerani aningaasat inatsisissaattut siunnersuusiorniarmata januarip naalernerani inatsisartut ilaasortaannut naasiussorneqarsinnaasussamik. Tassalu sioqqutsillunga qinnutigissavara 2006-imut aningaasat inatsisissaata upernaakkut ataatsimiinnissaq sioqqullugu tunniunneqarnissaanut piffissarititaasut atortinneqannginnissaat.

Naalackersuisut siunnersuutigaat inatsisartut siunertat ilaannut aningaasanik immikkoortitsissasut. Tamatumunnga patsisaavoq naalackersuisut isumaqarmata 2006-imut aningaasat inatsisaata kingusinaartumik akuersissutigineqarnera sammisaqarfiit ilaannut inuiaqatigiillu aningaasa-qarnerannut pitsaanngitsumik kinguneqarsinnaasoq. Taamaattumik naalackersuisut qinnutigaat tunniussinissamut piffissarititaasut atorineqannginnissaat. Naalackersuisut siunnersuutigaat makkununnga aningaasaliissutinik immikkoortitsisoqassasoq:

Matuma kinguliini naalackersuisut sinnerlugit inatsisissamut siunnersuutip ilai oqaaseqar-figissavakka.

Paamiuni mittarfik.

Inatsisartut aalajangiussimavaat pisortat angallannermut tapiissutaat malunnaatilimmik ikililerne qassasut ilinniartitaanerup aalajangersumik siunertalimmik aningaasaliiffiqarneqarnulernissaa siunertaralugu.

Sipaaruteqarfiusinnaasut tamarmik tungaviisa ilagaat Paamiuni mittarfeqalernissaq. Paamiunut Paamiuniillu helikopteri atorlugu angallassinermut kiffartuunneqarnissamik isumaqatigiissut ukiumut 21,5 mio. kruuninik akeqarpoq. Aningaasat taakkua 2008-miit sipaarneqarsinnaalissapput 2006-imi 2007-imilu Paamiuni mittarfiliortoqarpat Dash 7-inik iluanaaruteqarnissaq tungavigalugu orninneqartartumik.

Paamiuni mittarfiliornissaq november 2005-imi 141 mio. kruuninik akeqartussatut missingerneqarpoq, oqaatigineqassallunilu illoqarfimmiit mittarfiup tungaanut aqqusinissaq annertuumik ingerlanneqareersoq. 2006-imi 2007-imilu mittarfiliornermut akissajaatit 2007-imiit 2015-imut angallannermik ingerlatsinermi akissajaatikinnerulissutinit illuatungilerneqassaaq.

Mittarfik 2007-p naalernerani atorsinnaalerumallugu helikopterillu atorlugit ingerlatsineq 2008-miilli sipaaruteqarfigilerumallugu januar 2006-imi suliassat immikkuualuttortai ilanngullugit pilersaarusioneqalersariaqarpoq sulariumannittussarsiuunneqarlunilu. Naalakkersuisut siunertaraat 136 mio. kruunit sinneruttut 2006-imut aningaasat inatsisissaattut siunnersuummi 2006-imut 2007-imullu ilanngunnarlugit tamatumuunakkut Paamiuni mittarfiliornissaq pillugu inatsisartut inaarutaasumik isummernissamat periarfissinniarlugit februarimi martsimilu aningaasat inatsisaat pillugu isumaqatigiinniarnissani.

Aaqqissugaanermut ataatsimiititap isumaliutissiissutaata malitsigisaatut kommunit 2006-imi angalanernut ataatsimiinnernullu akissajaateqartussaapput ilaatigut kommunit kattussornissaat oqallisigalugulu isumaqatigiinniutigiummallugu. Aallaqqaatit borgmesterit kommunaldirektørillu sapaatip akunnera 9-mi Nuummi ataatsimiissallutik angalasussaapput. Tamatuma kingornatigut aamma kommunit immikkut angalasartussaapput timitalimmik isumaqatigiinniarnissaq siunertaralugu.

Pingaartumik Qaanaap Ittoqqortoormiillu kommunii angalanernut oqimaatsunik akissajaateqartussaapput kommunit nunatta suatungaani inissisimanermik kingunerisaanik aningaasar-

liortuugamik akileruminaatsitaminnik. Taamaattumik siunnersuutigineqarpoq 200.000 kruunit aningaasaliissutissatut immikkoortinneqassasut. Tapiissutit ataasiaannartumik tapiissutit tunniunneqassapput kommunit marluusunut avillugit.

Inuussutissarsiornermut, Nunalerinermit Suliffeqarnermullu naalackersuisoqarfiup pisariaqartissimavaa 2006-imi qaammatit pingasut siulliit ingerlaneranni inuussutissarsiutinik siuarsaavik Nukiit aqutigalugit inuussutissarsiutit siuarsarniarlugit tapiissuteqarnissaq aammalu pisariaqartissimallugu ukiup aallartinnerani IT-kkut aqqissugaanermut akissaajaateqarnissaq suliffeqarnermik nutarte-rinermit ingerlasumut atatillugu. Taamaammat naalackersuisut siunnersuutigaat 2006-imut ani-ngaasanut inatsisaagallartumi pineqartunut marluusunut katillugit 5,1 mio. kruunit atorineqassasut. Erseqqissarneqassaaq akissaajaatit amerliniarneqanngimmata, taamaallaalli pineqarluni 2005-imut aningaasaliissutigeriikkatta iluanni atuinissaq.

Erngup nukinga atorlugu nukissiorfinnut pilersaarutit.

Naalackersuisut kissaatigaat 2006-imut aningaasaliissutinut inatsigaallartumi pilersaarutit marluk ilassutitut ilanngunneqassasut, tamaalilluni pilersaaruserneq aallarniutaasumillu suliat 2006-imi qaammatini siullerni aallartinneqarsinaaqkullugit nangillugilluunniit ingerlanneqakqullugit.

Pilersaarut siulleq tassaavoq Utoqqarmiut Kangerluarsunnguanni Nuup eqqaaniittumi nukissiorfimmi turbinit pingajuata ikkussornissaa pilersaarutillu aapparaa Sisimiuni erngup nukinga atorlugu nukis siorfiliassap pilersaarusernera.

Naalackersuisut siunnersuutigaat erngup nukinga atorlugu nukissiuuteqarfissat taakkua pilersaarusernerannut il.il. 11 mio. kruunit immikkoortinneqassasut. Pilersaarutit piviusngortinneqassanersut qaqugulu piviusngortinneqassanersut inatsisartut ataatsimiinnerini aggersuni oqallisigisarumaarpat aalajangiinissamut qularnaatsumik tunngavissaqarpialeriarutta.

RAB-ip 1. januar 2006-imi allamut tunniunneqarnissaa.

2005-imut aningaasat inatsisaanni Naalackersuisut siunertanut kontomut 10.13-imut, Namminersornerullutik Oqartussat suliffeqarfii, oqaasertaliussatigut pisinnaatinneqarput Royal Arctic

Bygdeservice A/S, Royal Arctic Line A/S-imiit KNI A/S-imut 1. januar 2006-imiit tunniunnissaanut.

Royal Arctic Line A/S KNI A/S-ilu piarersareersimapput tunniussinerup 1.1. 2006-imi pinissaanut.

Naggataatigut Naalackersuisut qinnutigissavaat aningaasat ukiuannut 2006-imut inatsisartut aningaasaliissutitut inatsisigigallagaata allannguutissaatut inatsisartut inatsisissaattut siunnersuut piffissakinneq patsisigalugu Inatsisartut Aningaasaqarnermut ataatsimiititaanni suliassanngortinneqassanngitsoq.

Taamatut oqaaseqarlunga siunnersuut Inatsisartuni akuersortumik suliarillaqullugu oqaluuserisas-sanngortippara.

Jonathan Motzfeldt, Inatsisartut Siulittaasuat, Siumut.

Maannalu partiit oqaaseqartuini siulliulluni oqaaseqassaaq Jens Lars Fleischer, Siumut.

Jens Lars Fleischer, Siumut.

Aningaasat ukiuannut 2006-imut Inatsisartut aningaasaliissutitut inatsisigigallagaata allannguutissaanut Inatsisartut inatsisissaattut siunnersuut Siumumiit imatut oqaaseqarfigissavarput.

Aningaasanut Nunanullu allanut Naalackersuisup naalakkesusit sinnerslugit saqqummiussaa Siumimiit tamakkiisumik isumaqatigaarput makkuali annikkitsumik taasaqarfigissallugit: Paamiuni mittarfiliortoqarnissaata pisariaqartinneqarnera Siumumiit arajutsisimanngilarput tassami siunissa mi qaninnerusumi angallannikkut aaqqissuussineq iluatsittumik ingerlanneqassappt Paamiuni 2006-imiit aallartittumik mittarfissap sananeqalernissaa avaqqunneqarsinnaanngimmat, taamaammat Naalackersuisut kaammattussavagut matumani saqqummiunneqartut piviusunngortinneqarnissaanut sulinertik ingerlateqqullugu. Ilanngullugu Siumumiit maluginiarparput ullumikkut angallannermi ingerlatsinermut aningaasartuuterpassuit annertuut helikopterimik ullumikkut angalla ssinermi aallaaveqarmata, taamaammat helikopterimik angallassinerit qimakkiartornissaannik Naalackersuisut siunertaqarnerat Siumumiit paasilluarlugu taparserparput.

Aaqqissuussaanermut nutarterinissamut atatillugu kommunit angallannermut tapiissuteqartoqarnissaanniik Naalackersuisut siunnerfeqarnerat Siumumiit taparserparput

iluarisimaarlugulu 2006-imi kommuunik aqqissuussiniarnermik sulinerup politikikkut ingerlannissaa siunertarineqarmat.

Siumumiit erngup nukinganik nukissiorfinnik ineriartortitsinerup ingerlateqqinnissaa Naalackersuisut piaartumik siunnefeqrmata taperserpavut.

Sisimiuni nukissiorfissap kinguarsarnagu sananeqarnissaa Siumumiit suleqataaffigissavarput.

Ilanngullugit makkua Naalackersuisunut kaammattuutigissavagut: Sinerissami illoqarfiit nunaqarfiillu erngup nukinganik atuinissamik periarfissaqanngitsut eqqarsaatigalugit anorip seqerngullu nukiginik atuinissamat periarfissaasa aqutsissiuunnissaat piaartumik aallarteqqullugu.

Royal Arctic Bygdeservicep RAL-miit KNI-mut tunniunnissaa Siumumiit aamma taperserparput. Ilanngullugu Naalackersuisunut qulakkeerniaqquarput nuussinissamat ingerlatsinissami pilersaarutip qularnaarneqarnissaa kiisalu sulisoqarnermut tunngasut pillugit nassuiaammik Naalackersuist minnerpaamik Aningaasaqarnermut Ataatsimiititaliamut saqqummiussinissat Siumumiit piumasaraarput.

Taamak oqaaseqarluta Naalackersuisut 2006 aningaasaliissutinut Inatsisartut inatsisigallagaata al lannguutissaatut siunnersuutaat Siumumiit akuersaarparput, taamatullu isikkoqarluni aappasaaneerseqarnissaa pingajussaaneerseqarnissaallu inassutigaarput.

Jonathan Motzfeldt, Inatsisartut Siulittaasuat, Siumut.

Tulliulluni oqaaseqassaaq Johan Lund Olsen, Inuit Ataqtigiit.

Johan Lund Olsen, Inuit Ataqtigiit:

Qujanaq.

Inuit Ataqtigiit soorunami paasisinnaalluarparput Aningaasanut Nunanullu Allanut Naalackersuisutut ingerlaqqittup saqqummiussaa manna ullumikkut naammassiniartariaqaripput taamaattumillu pisarnertut pinnata suliaq ullumikkut Inatsisartut Aningaasaqarnermut Ataatsimiititaliaat aqqusaaqqaanngikkaluarlugu kiisalu

isumaliutissiissuteqarfigeqqaanngikkaluarlugu aamma naammassisariaqaripput, Inatsisartunummi qinerseqqammerpugut. Ullumikkut inissitsisnarniarluta katersuuppugut kiisalu ullumikkumii aatsaat nutaanik naalackersuisortarpugut.

Naalackersuisunngortinneqaqqammersusi tamavissi pilluaritsi sulilluarisilu. Soorunami naalackeruisunngortinneqaqqammersut periarfissinneqaqqaartariaqarput tamakkiisumik 2006-imut ukiunullu missingersuusiorfiusunut aningaasanut inatsisissatut siunnersuusiornissamat tulliani, tassalu ukiortaariitsiarpat Inatsisartunut saqqummiunneqarumaartussa.

Taamaattorli Aningaasanut Nunanullu Allanut Naalackersuisoq ilumoorpoq oqarmat aningaasaliissutit ilaat utaqqisinneqarsinnaanngitsut taamaattumillu siunertanut ikittunut immikkorluinnarlu ittunut maannangaaq aningaasaliissuteqareertariaqartugut inuiaqatigiit unittunnginnissaat aamma eqqarsaatigalugu.

Inatsisaagallartussami matumani saqqummiunneqartut ilaatigut aamma qineqqusaaqqmmernermi tikinneqartarsimasut Inuit Ataqtigiit soorunalimi pingaartippaat taamaattumillu aamma tunuliaqusersussavagut, taasinissatsinnilu aamma kuerseqataaffigissallutigit.

Uuliap akiata qaffakkaluttuinnarnertup aammalu silaannaap kissakkaluttuinnartup pisussaaffilerpaatigut nukissiuutinut ataavartunut soorlu erngup nukinganut pilertornerusumik nuukiartulernissamat. Allamik qinigassaqagaanngilagut imerli tassanngalu nukik pilersinneqarsinnaasoq sippulissuarmik pigereerparput allaat brintiliornissamat alloriarlaannangorluta.

Paamiut mittarfittaarnissaat, inuutissarsiutitigut siuarsaaniutissat, nunaqarfinnut ilaasunik assartugassanillu kiffafртуussinerup pitsanngorsaaffigineqarnissaat inatsisaagallartussami pingaartitatsinnut aamma ilaapput.

Taamaattumik taama naakkaluamik oqaaseqarallaannartuta Inuit Ataqtigiit nalunaarutigivarput saqqummiussa q tamakkiisumik tapersorsoratsigut.

Jonathan Motzfeldt, Inatsisartut Siulittaasuut, Siumut.

Taava tulliulluni oqaaseqassaaq Ellen Christoffersen, Atassut.

Ellen Christoffersen, Atassut:

Inatsiartunut 15. november 2005 qinersisoqartussanngornera pissutigalugu Aningaasanut Inatsisissaq 2006-imoortoq suliarineqarsimanngilaq, maannakkullu Inatsiartunut qinersisoqareernerani Naalakkersuisut 2006-imi Inatsiartut ataatsimeeqqaarnissaanut 2006-imut Aningaasanut Inatsiartut siunnersuummik saqqummiussinialikkerseraanaerat Atassummiit pissusissamisoortutut isigaarput.

Atassummiit naalakkersuisut Inatsiartut aningaasaliissutitut inatsisigigallagisaata allannguutissatut Inatsiartut inatsisissaatut siunnersuutaat tamakkiisumik akuersaarparput.

Paamiuni mittarfiliornissamat november 2005-imi 141 mill. koruuninik akeqartussatut missingerneqarsimasooq aappaagumullu ukioq 2006-imi aammalu ukioq 2007-mi mittarfiliornerup ingerlanneqarnissaa Atassummiit akuersaarparput, pingaaruteqarpormi innuttaasut eqqaatsumik angallannikkut kiffartuunneqarnissaat minnuerunngitsumillu aamma siunissaq ungasinnerusoq eqqarsaatigalugu silaannakkut angallassinikkut akikillisaanissaaq anguneqassammat.

Aaqqissugaanerup nutarternera eqqarsaatigalugu angalanissanut tapiissutitut siunnersuutigineqartut Atassummiit iluarisimaarparput, taamaattorli apeqquserparput ilumut aningaasat tapiissutissatut siunnersuutigineqartur kr. 200.000-it naammassanersut. Piffissami kingullermi tusartuarterparput minnerusut aammalu isorliunerusut aningaasarsiornikkut inissisimanerat oqitsuinnarmik ingerlanngitsoq. Taamaattumik Atassummiit aningaasat tapiissutissatut siunnersuutigineqartut naliliiffigineqaqqinnissaaq innersuussutigissavarput kommuninut allanut pisariaqartitsineq naapertorlugu aamma tutsinneqarsinnaanissaa siunertaralugu.

Inuussutissarsiutit siuarsarnissaannut aningaasaliissutit suliffeqarnermullu nutarterinermut siunnersuutigineqarsimasut aammattaaq akuersaarparput, pingaaruteqarpormi inuussutissarsiornikkut siuarsaanerup suliffeqarnikkullu nutarterinerup ingerlaannarluni uniinnarallartinninnissaa.

Taamatut siunnersuutigineqartut tamaasa oqaaseqarfiginngikkaluarlugit Atassummiit siunnersuut akuersaarparput immikkullu angalanissamut tapiissutit annertussusaasa agguaassisarnissarlu pillugu naliliffigineqaqqinnissaa innersuusstigalugu.

Jonathan Motzfeldt, Inatsisartut Siulittaasuat, Siumut.

Tulliuppoq Lene Knüppel, Demokraatit.

Lene Knüppel, Demokraatit:

Per Berthelsenip angalanissamut tapiissutitut oqaasiisa saniatigut kommuninut allannguissamut tunngatillugu Demokratit siunnersuumut allanik oqaasisaqarput.

Demokratit aningaasaliisoqarnissaanut siunnersuut tapersersorpaat inatsisissatullu siunnersuut tapersersorlugu, kisiannili § 1-imi, imm. 11-mi allaqqagami kr. 600.000-inik siunertamut immikkoortitsisoqassasoq taavalu oqaaseqaatini nalinginnaasumik kr. 650.000-itinngorsimallutik. Taamaattumik inatsisilerituunik misissuisoqartussaalluni taavalu nutserinermut aningaasartuuteqartussaalluni.

Eqqartuussisulerisunut tunngatillugu kissaatigissavarput tamanut suliarinnittussarsiuussisoqassasoq, taavalu aamma saniatigut Demokraatiningaanniit Aningaasaqarnermut Ataatsimiititaliami aappassaaneerneqannginnerani suliarineqassasoq.

Jonathan Motzfeldt, Inatsisartut Siulittaasuat, Siumut.

Taavalu Anthon Frederiksen, Kattusseqatigiit Partiiat.

Anthon Frderiksen, Kattusseqatgiit Partiiat.

2006-imi aningaasanut inatsisaagallartumut allannguutissatut siunnersuut Kattusseqatigiit Partiiata imaattumik oqaaseqarfiginiarpaa.

Siullermik tamatta nassuerutigisariaqarparput Inatsisartunut immikkut ittumik qinersisoqartariaqarsimanera akisuinnarani aammali suliassarpassuarnut kinguaattoorutaammat, taamaammat politikkikkut suliassat uninngasut piaarnerpaamik aallarteqqinneqarnissaat

anguniarlugu aningasat pisariaqartinneqartut manna qinnuteqaatigineqartut akuersissutigineqarnissaat Kattusseqatigiit partiiata tunngaviatigut paasilluarlugit akuersaarniarpai.

Taamaattorli Kattusseqatigiit sakkortuumik piunasaqaatigaa meeqqat ilaasa naammaginangitsumik paarineqartarnerat isumassorneqartarnerallu minnerunngtsumik aamma ilaqutariit ilaasa ajornartorsiuteqartut piaarnerpaamik ikiorsiivigineqarnissaat anguniarlugu Naalakkeruisut sulissuteqarnissat matumuuna kaammattuutigineqartariaqartoq aammalu taakkununga naammattumik aningaasaliisoqarnissaa aamma akuersissutigineqartariaqartoq, tamannalu ataatsimiititaliakkoorlugu suliarineqartoq Kattusseqatigiit partiiata inassutigaa, tassami qineqqusaarnermi kingullermi innuttaasut pisariaqartitaat siulliunniartariaqartut ersarissumik innuttaasunit piunasaqaatigineqartut paatsoorneqarsinnaangitsumik saqqummiunneqareermata.

Taamaattumik piunasaqaatit inunnut tunngassuteqartut aamma aningaasarpassuarnik naleqartussaammata Kattusseqatigiit Partiiianiit matumuuna inussiarnersumik Inatsisartunut Naalakkersuisunullu kaammattuutigaarput Paamiuni mittarfissamut aningaasalersuinissat 136 mio. koruuninik missingersorneqartut nunatta avataaniit aningaasalersorneqarsinnaanerata misissoqqullugu taamaaliornikkut meeqqat ilaat piaartumik isumagineqartariaqartut ilaqutariillu ilaat aamma piaartumik ikiorserneqartariaqartut annertuumillu ilaatigut pisariaqartitsisut piaarnerusumik ikiorserneqarnissaat anguneqarsinnaaqqullugu qulakkeerneqarsinnaaqqullugulu kaammattuutigaarput.

Erseqqissassuarpulli Paamiuni mittarfittarfiup suliarineqarnissaa Kattusseqatigiit Partiiata tunngaviatigut isumaqatigimmagu minnerunngtsumik siunissaq ungasinnerusoq isigalugu aningaasartuutikillisaanissaq aamma eqqarsaatigalugu.

Kisianni aamma erseqqissaatigissavarput Landskarsip aningaasaataasa atorneqarnissaat tulleriarilluarnikkut inuk qitiullugu ingerlanneqarnissaat Kattusseqatigit Partiiata pingaatilluinnarmagu.

Taamaammat Paamiuni mittarfissaq avataaniit aningaasalersorneqarsinnaanera periarfissatut pitsaasutut isumaqarfigaarput. Aamma oqaatigisariaqarpoq timmisartunut sulusalinnut Dash 7-inut Paamiuni mittarfissap naleqqussartariaqarsorinangimmat, tassami siusinnerusukkut Inatsisartuni

inimi maani ilisimatinneqarnikuuvugut Dash 7-init ukiualuit qaangiuppata atorunnaassasut, taamaattumik paasissutissat taamaattut eqqortuusimappata, soorunami naatsorsuutigaarput eqqortumik paasitinneqarsimanissarput, taava mittarfiliornissami pissutsit tamaattut aamma naleqqussartariaqarmata kingusinnerusukkut kukkussutaasinnaasut akisunaaqqunagit.

Erngup nukinga atorlugu nukissiorfinnut pilersaarutit aamma tamakkiisumik taperserpavut, ksianni uterfigeqqinngitsoorusunngilarput erngup nukinganik nukissiorfiliornissamut pilersaarutit siullerpaartaat 1970-ikkunnili pilersaarutaareersoq tassalu Ilulissat eqqaani Paakitsumi nukissiorfeqalernissap pisariaqarluinnarnera piaartumik pilersaarusiortariaqarmat. Taamaaliornikkut aamma nunaqarfinni illoqarfiillu ilarpassuini kallerup innerata akitsoraluttuinnartup akigititai apparsarneqarsinnaanissaat angusinnaaqqullugu.

Inuutissarsiutit siuarsarnissaat aningaasaliissutillu suliffissaqartitsinerusumik nutarteriffiqineqarnissaat aamma Kattusseqatigiit Partiiata tamakkiisumik tapersorsorpai, taamaammat aamma Kattusseqatigiinniit peqataarusuppugut inuutissarsiutit siuarsaavigineqarnerannut atatillugu inatsimmik naleqqussaaqqinnissaq Kattusseqatigiit Partiiianiit ilanngullugu kaammattuuigaarput, taamaattumik inuutissarsiutinut tapiissuteqartarneq inatsisip 2004-miik atuutilersumik kommunit aningaasaleeqataasinnaanerisa annertuallaartumik killiliivigineqarsimanerat aamma ingerlatsiniarlutik nutaanillu aallartiterusukkaluartunut killileeqaammata matumuuna inatsisip pineqartup aamma eqaannersumik periarfissaqartitsivigineqarnissaa Kattusseqatigiit Partiiata kaammattuutigaa.

Ilanngullugu piumasaqatiginngitsoorsinnaanngilarput maannakkut ukiup taarseruttornerani piniartortatta aammaasiit inuutissarsiornermimmi oqimaarsareeqisut pillakkatut piniqqusaanngitsutullu naalakkeruinikkut inissinneqaqqinnerat Kattusseqatigiit Partiiata akuersaarsinnanngilluinnarmaga, taamaammat Kattusseqatigiit partiiata qilaluarniartarneq pillugu aalajangersaasimanerit piniartut kommunillu pineqartut peqatigalugu aaqqiisoqarnissaa ilungersortumik matumuuna kaammattuugaa, tassami piniartut ukiup taamaalinerani ilungersunartoriortarnerat pinngitsoorani aaqqiivigineqartariaqarmat.

Aammaasiit puisit amii akikillineqaqqipput. Ukiuni kingullerni aamma ilisimaneqareerpoq puisit amiinut tapiissutaasartut ukiup taamaalinerani nungunneqareertartut imaluunniit ammerivimmiit

atorneqarneat pissutsinut piviusunut naapertuutinngitsumik aqunneqartarnerat pissutigalugu piniartut ameerniartartullu allat nunguunneqartartut. Pissutsit taamaattut naalakkersuinikkut ammerivimmut ersarissumik piumasaaateqarnikkut iluarsiivigineqartariaqarput. Taama Kattusseqatigiit Partiiat kaammattuuteqarpoq, maannakkullu piniartut taakkualu ilaqutaat aamma ukiup taarseruttornerani namminneq piumassuserinngisaraluaminnik atugarliortinneqartut piniagassanik ammaaffigineqarnissaat periarfissinneqartariaqarpoq aammalu puisit amiisa ukiup sinneranut tapiiffigineqaqqinnissaat aningaasaliiffigineqaqqinneqartariaqartoq Kattusseqatigiit Partiiata ilungersortumik matumuuna piumasaqaatigaa, tamatumunngalu ilanngullugu oqaatigineqartariaqarpoq pingaartumik ulluni makkunani avannaani qilalugarniartarnermut tunngatillugu piniartut qilalugartassaminnik ammaaffigineqarnissaat periarfissinneqartariaqarmat piaartumik.

Taamatut oqaaseqarlunga inuk pingaarnertullugu sulisoqarnissaa inassuteqaatigiutigalugu naalakkersuisut piffisamik periarfissamik sanioqqutsinissamik qinnuteqaataat paasilluarlugu akuersaarpara.

Jonathan Motzfeldt, Inatsisartut Siulittaasuut, Siumut.

Aningaasaqarnermut Naalakkersuisoq akissuteqartinnagu erseqqissaatigilaassavara uani isummefifssat aalajangersimalluinnartut Naalakkeruisut saqqummiimmatigit, isummerfissat tallimat. taakkua avataatigit soorunami allat oqallisiginissaat ussarnartorsiorsinnaagaluartoq, kisianni taakkuupput isummerfissatut tunngavissatut saqqummiunneqarsimasut taakkulu tunngavigalugit oqallinneq maannakkut ingerlavoq. Aningaasanut Naalakkersuisoq.

Josef Motzfeldt, Aningaasanut Nunanullu allanut Naalakkersuisoq.

Qujanaq.

Tassa siullermik ukiuni 15-inngulersuni qularnanngilaq ,ittarfiliortitsernerup aallarti nneqarneraninngaanniit eqqarsarutta Paamiut siullermik pilersaarutinut ilaasimasoq. Kiisami paasinarpoq Inatsisartuni tamakkiisumik isumaqatigiissutigineqartoq Paamiuni suluusalinnut mittarfiliornissaq massakkut piviusunngortinneqartariaqartoq. Tamanna Paamiorminut tusarluarnarpoq aamma isumaqarpunga Inatsisartut inuiaqatigiit aningaasaqarniarnerat eqqarsaatigalugu isumatusaatumik taanna qujassutigissallugu Naalkkersuisuniinngaanniit pissutissaqartugut.

Siullermik kommuninut tunngatillugu kommunit
nutartinnerterneqarnerannut/aalannngortiterneqarnerannut tunngatillugu ataatsimiittarnissanut
siullermik ataatsimiigiartar nissanut Ittoqqortoormiut Qaanaallu kommunabestyrelsianinngaanniit
aallartitaasartussat qinnuteqaassunneqarput, taava takujumaarparput ilaatigut
oqaaseqartuiningaanniit kissaatigineqartutu kommunit allat pisariaqartitsinersut imaluunniit
Qaanaap komm unianut Ittoqqortoormiullu kommunianut tapiissutigineqartussat kr. 200.000-it
naammannersut. Taakkua februar martsitunnigau nungunneqarnavianngimmata taamanikkussamut
kattuffiat peqatigalugu aamma nalersuisinnaasariaqarnerput naalackersuisuninngaanniit
piareersimaffigissavarput.

Mittarfiliortiternerit ingerlateqqinnissaat soorunami Naalackersuisut pilersarusiussavaat.
pisariinnerusunik mittarfiliortiternissat ilaatigut Inatsisartut siuliini taakkartorneqartareerput
taamaamat nunatsinni mittarfiit takissuut imarpik qulaallugu timmisartunut ingerlasartunut
miffiusinnaasut sorliunissaat taanna isumaliutitsiniisittariaqarparput aamma.

Mittarfiit pioreersut killeralannguani takisoorujussuarnik allanik nutaanik sanaartonissaq ilanngul
lugu Inatsisartut kisimik pinnatik Naalakkeruisut aamma isummerfigisassarissavaat.

Soorunami uuliatortunik innaallagissiorfeqarnerup saniatigut nutaanik allanik ujarlernermi siulle
rpaatut massakut aalajangiussimaneqartoq tassaavoq erngup nukinga atorlugu inaallagissiornerup
pujassaqqinnissaa/annertusaaviginissaa tassalu Tasiilami naammasureerpoq, Qorlortorsuarmi
piariissaaq ukiup tulliata tulliani taavalu Sisimiuni aallartittussanngorpugut annertuumik taannalu
tassa pilersarusiussavarput.

Kisianni taassumap saniatigut oqaatigineqartutuut ukioq naallugu kuinnartorsuarmik
kuussuaqanng itsuni nukissiuutaasinnaasut allat atorneqarsinnaaneat Naalackersuisut siulliit
piareersareerpaat ilaatigut nunarsuup erlaveqarfiisut taaneqarsinnaasut nunarsuup iluata kissarnea
ilaatigut atorneqarsinnaasoq nukissiornermut aammalu soorunami anori taavalu aamma seqerngup
qaammarna aamma atorneqarsinnaasoq. Tamakku tamarmik Nukissiornermut Pisortaqarfimmi
ingerlanneqareersut naalakkeruisup nutaap nangissagai Naalackersuisuni soorunami
peqataaffigissavarput.

Ryoal Arctic Linep KNI-mut nuunneqarneranut atatillugu Siumup kissaatigisaa sulisoqarnermut minnerpaamik Aningaasaqarnermut Ataatsimiititaliamut nassuiaassutigineqarnissaat Sulisoqarnermut Naalakkersuisup aamma Anagallinnermut Naalakkersuisup naatsorsuutigaara taanna naammassiniassagaat. Aamma ajornartorsiutaarujussuarnaviarungangilaq.

Kommuninut apiissutit naliliiffigeqqullugit arlalinnik oqaatigineqartoq, tassa taanna Naalakkersuisut februariutinnagu taanna isummersorfigissavarput.

Kiisalu WTO-mut aningaasaliunneqartut inatsisissatut siunnesuummi kr. 600.000-inik, tassalu 0,6 mio.-nit tassa mtaamatut allattarparput, kisiannili nalinginnaasumik oqaaseqaatitaani allassimavoq kr. 650.000,00-it pineqartut. Tassani toqqarneqarsinnaagaluarpoq 0,7-ussanersoq imaluunniit 0,6-ussanersoq, kisianni teknikkikkut atorfillit siunnersuutip taassuma suliarineqani 600.000 tassa 0,6-inngortissimavaat. Taanna nalinginnaasuvoq taakkulu atorneqarnissaat aamma allassimasutut tassaavoq kr. 50.000-it atorneqassasut inatsisiliarisimasatta WTO-mi aalajangiisartunit paasisinnaangorlugit nutserneqarnissaannut taavalu kr. 600.000-it atorneqassallutik inatsisilerituut nunat tamat akornanni paasisimasallit WTO-mut naleqquttunik inatsisaateqarnersut inatsiliorsimanersugut misissuisinnissaannut atorneqassallutik.

Taavalu Paamiut mittarfiliassap nunat tamat akornanni attartorluni aningaasalersuinermit pineqassanersoq taanna februarip tungaanut isummerfigissavarput. Oqaannarpugut november 2005-imi 141 mio. nalilerneqarpoq taakkunannga 5 mio.-nit atussavavut massakkut pilersaarusiornermut Inatsisartut tunngavigissaarlutik aalajangiinissaannut taavalu aamma neqeroortitsinissamut suliarinnittussarsiuussinissamut piareersanermut atussagatsigit taakkua aningaasat.

Taavalu massakut Inatsisartunut Siulittaasup oqarneatut massakkut oqaluuserineqartussaatur ilaatinneqanngitsut tassapput soorunami Kattusseqatigiinninngaannit ilaatigut taagorneqartut ukiup taarsenirani piniartut ajornartorsiortarnerat. Naalakkersuisuninngaanniit arajutsisimanngilarput piniartutut inuutissarsiorneq ukiup taarsinerinnaani ukioq kaajallallugu ajornartorsiorfimmi inissisimasoq, taamaammat taanna ukiup taarsinerinnaa eqqarsaatiginagu piniartuussutsip qanoq iluarsaassiviginissaa piniartut taakkulu kattuffiat seulqatigalugit suliniutigissagippat Naalakkersuni isumaqatigiissutitsinnut ilaavoq, taamatullu aamma amminut tapiissutit imaaliiallaannaq 2006-imi inatsisaagallartup allanngortinneratigut aaqqissinnaanngilagut. Naalakkersuisunngortut

piffissalernerqartariaqarput Aningaasaqarnermut Ataatsimiititaliamut qanoq
saaffiginnissuteqarnissaminnut isumaliuteqarnersut. Tassa imaappoq 2005-ip naalernerani ammit
ukiup ima naggataani amminut tapit nungoreersut qanoq isummerfigineqarnissaat Nalakkersuisut
nutaat tamatumunnga akisissaassuseqartumik suliarissavaat.

Qujanaq.

Jonathan Motzfeldt, Inatsisartut Siulittaasuat, Siumut.

Tulliulluni oqaaseqassaaq Lene Knüppel, Demokratit.

Lene Knüppel, Demokratit:

Naatsunnguamik aperiniarpunga. Naalakkersuisut eqqarsaatigisimaneraat inatsisit
iluarsanneqarnissaat WTO-mut tunngatillugu siunissami, tassalutunngatillugu,
Qujanaq.

Jonathan Motzfeldt, Inatsisartut Siulittaasuat, Siumut.

Tulliuppoq Ellen Christoffersen, Atassut.

Ellen Christoffersen, Atassut:

Vi siger tak fra Atassut fordi Landsstyremedlemmet vil være opmærksom på at andre kommuner
end Ittoqqortoormiut og Qaanaaq kan bevilges rejsetilskud ifm. udarbejdelse af Finanslovsforslaget.
Det er meget væsentligt, at når en så vigtig sag skal behandles, så alle kommuner deltager så
.....og derfor ser vi frem til det kommende arbejde.

Jonathan Motzfeldt, Inatsisartut Siulittaasuat:

Næste taler er Anthon Frederiksen, Kattusseqatigiit Partiiat.

Anthon Frederiksen, Kattusseqatigiit Partiiat.

*** piaartumik ilanngutassaq.

Josef Motzfeldt, Aningaasanut Nunanullu allanut Naalakkersuisoq.

Siullermik WTO-mut tunngatillugu tassa nunat tamat akornanni niuernermit kattuffissuup
piumasarisai najoqqutaralugit nunarput ilaasortaammat, eqqartuussisuserisunut

sulisitsinissamut, taakkua aqqusinermi sumiluunniit napitassaanngilaat, immikkut WTO-p inatsisiliaanut tunngasunik inatsisiliortarnerannut tunngasunik ilisimasalinnik peqarpoq nunat tamat akornanni tamakkuninnga immikkut suliaqarnissamut piukkunnarsarsimasunik. Taakkua 2001-imili toqqarneqareerputsulereerlutillu. Taakkuli inaarsaanissaannut aningaasa decemberi 7-utinnagu sapinngisamik aalajangereersimassagatta taavalu WTO-p allattoqarfianut nalunaareertussaagatta taakkua suliariumattussarsiuussinermik Demokratit piumasarisaat ingelareermata sulissat taakkua pissarsiarineqareersimammata taanna ajornakusoorpoq.

Nutserinerilli ingerlateqqinnissaanut soorunami suli aalajangertoqarsimanngilaq inatsisiliagut tulut tuunngortinnissaannut kikkut nutserisuiussanersut. Nutserisussarsiorneq tamatigut nalinniginnaasumik ammasumik ingerlanneqartarpoq.

Taavalu qilalukkanut amminullu tunngasut massakkut oqaluuserineqanngitsut Inatsisartut Siulittaa suanit oqaatigineqareermata annertunerusumik oqaaseqarfiginagit massakkut tamakkiisumik aaqqiinianermi aamma qineqqusaarnerup matuma nalaani tamanit eqqartorneqareersut Naalakkersuisut sulniarlutit aalajangereerpugut aamma iluunngilaq ukiup taamaalinerani ukiut tamaasa amminut apiissutit nunguttarmata aatsaat siullermeertumik aningaasat amminut tapiissutit nunngunneqarput. Qujanartumik amerlanerusunik ilimagisaminngaanniit 20.000-it angullugit amerlanerusunik piniarnermi puisittoqarsimammat.

Jonathan Motzfeldt, Inatsisartut Siulittaasuat, Siumut.

Taamaalilluni siullermeerneqarnerani oqaaseqarumasut maannakkut oqaaseqareerput, taavlu amerlanerusut kissaatigaat maani piffissaliussat saneqqullugit suliassaq taanna naammassiniartariaqartoq piaartumik suliassat ingerlaqqinnissaat pisariaqartitsimmat. Taava maannakkut aappassaaneerneranut ingerlasinnaavugut siunnersuutillu taama isikkoqarluni, allanguutissatut siunnersuummik aamma ikkuttoqarsimanngimmat, siunnersuut tamma isikkoqarluni aappassaanneerneqarnirani maannakkut akuerineqarnissaanut isumaqataasut qinnuigissavakka nikueqqullugit.

31-it

Tamarmik isumaqataapput.

Taamaalilluta akuersissutigineqareermat aappassaaneerluni maannakkut
pingajussaaneer neqarneranut taama isikkoqarluni akuerineqarnissaanut isumaqataasut
qinnuigissavakkat nikueqqullugit.

31-t.

Jonathan Motzfeldt, Inatsisartut Siulittaasuat, Siumut.

31-t.

Taamaalilluni Inatsisartut tamarmik akuerivaat Aningaasat ukiuannut 2006-imut Inatsisartut
aningaasaliissutissatut inatsisigigallagaata allannguutissaanut Inatsisartut inatsisissaattut
siunnersuutit. Maanilu partiininngaanniit oqaaserineqartut Naalakkersuisullu akissuteqarfigerigai
innersuussutigissavara aamma suliassap matuma ingerlaqqinneqarni eqqaamaneqaqqullugit.

Ulloq ataatsimiiffik siulleg, sisamangorneq 1. december 2005 nal. 14.00

Oqaluuserisassani immikkoortoq 17

2006-imi ileqqusumik ataatsimiittarnissat allajangersarneqarnerat.

(Inatsisartut Siulittaasoqarfiat)

Ataatsimiinnermik aqutsisoq: Jonathan Motzfeldt, Inatsisartut Siulittaasuat, Siumut.

Jonathan Motzfeldt, Inatsisartut Siulittaasuat, Siumut.

Taava maannakkut tikipparput Inatsisartut 2006-imi ileqqusumik ataatsimiittarnissaasa aalajangersarneqarnerat. Tassunga tunngatillugu oqaatigineqassaaq 2006-imi Aningaasanut Inatsisissatut siunnersuutip suliarineqarnissaa siunertaralugu piaartumik ataatsimiinnissaq pisariaqartutut nalilerneqarsimammat.

2006-imi aningaasanut inatsisissatut siunnersuutip januarip naalernerata nalaani Naalakkersuisunit tiguneqarsinnaanissaa naatsorsuutigineqarpoq.

Ulloq 15. februar 2006 aallarnerfigalugu 2006-imi ukiuunerani ataatsimiinnissaq inassutigineqarpoq.

Tamatuma saniatigut 2006-ip ingerlanerani suliarineqartussatut siunnersuutit arlallit saqqummiunneqarnissaat naatsorsuutigineqarpoq. Taamaattumik ulloq start 21. april 2006 aallarnerfigalugu 2006-imi upernaakkut ataatsimiinnissaq aamma inassutigineqarpoq.

Inatsisartut ataatsimiinneri taakku marluk qanoq siviutigiumaarnersut suli naliliiffigineqarsinnaanngilaq. Tamatumani siunnersuutit qanoq amerlatiginissaat utaqqineqartariaqassaaq.

Kisiannili peqqussutit najoqqutaralugit 2006-imi ukiakkut ataatsimiinneq ulloq 16. september 2006 aallartittussanngorlugu aggersaasoqarnissaa naatsorsuutigineqarpoq. Apeqqutigissavara partiinit oqaaseqarfigiumaneqarnersut ukiuunerani ataatsimiinnissaq 15. februar 2006 aallartissaaq taannalu sivissusseqarsinnaavoq february naallugu imalluunniit martsip naaneranut. Taava upernaakkut ataatsimiinnissaq aallartissasoq 21. april 2006 aamma taassuma sivisussusissaa, soorunami aassakkut sulinnigiffeqarnerup tunngaanut ingerlanneqarsinnaanera naatsorsuutigineqassaaq imaluunniit sivikinnerusinnaavoq.

Ullut taakkua siunnersuutigineqartut akerleralugit oqaaseqartoqarumasooqanarluni. Taamaangippat taakku tunngavigalugit ataatsimiinnissat pilersaarusionerqarnerat ualeq mannamiit aallartinneqassaaq.

Tassa taamaalilluni maani inimi akuersissutigineqarpoq Inatsisartut ukiuunerani ataatsimiinnissaat 16. februar 2006 aallartissasoq upernaakkullu ataatsimiinnissaq aallartissasoq 21. april 2006.

Tassalu suli oqaatigisinnaanngikkallarparput oqareernittut qanoq sivisutigumaarnersut ataatsimiinnerit taakku marluk.

Taava ukiakkut ataatsimiinnissaq taanna suleriaatsitsinni allareersimavoq tallimanngornerit pingajuat septemberimi aallartittassasugut tassalu 16. september 2006 ukiakkut ataatsimiinnissaq taamaalilluni aamma akuersissutigineqarpoq.

Taamaalilluni ullumikkut ataatsimiinnermi ammasumi suliassa naammassivagut taavalu ullumikkut ilaatigut Demokratinit oqaatigineqartoq ammasumik suliarisinnaanerigut, soorunami tassunakkut oqarpunga suleriaatitsinnik allannguutissamik aalajangiinissaq tassani pisariaqassaaq. Tassa imaakkami ajornaquteqanngilaq maani partiit namminenq aalajangersagaat taakkua sumut ammasumik tamarmik tusagassaannik suliarigaanni sivitsortaraluaqisoq, kisianni matoqqsarneranut pissutaasut aamma uani oqaatigisariaqarpoq: Partiit namminneq akunnerminni suliassatit agguaatileraagatigit aamma ataatsimiititalinik, rådinik nævnenillu taaneqartarsut Siunnersuisartut taavalu aamma ataatsimiititaliat, taakkua avataaninngaanniit inuttalersukkat maani oqallisigineqartarput. Taamaattumik kissaatigineqarneq ajorpoq ataatsimiinnerit taamatut ittut ammasumik ingerlanneqarnissaat, avataaninngaanniit inuit maannga aatsaat eqqullugit

taagorneqartut ammasumik inuit kikkuuneri aammalu suut suliarisinnaasimasaat allallu akulerussorussorlugit oqallinnissaq pinngitsoorumallugu. Massa taanna matoqqasumik tamarmik periarfissaqartaraluartoq. Taanna oqaatigaar maannakkut suleriaatsitsinni taanna tunngaviummat. Ataatsimilluunniit matunissaanut tunngavissaqanngilaq partiit namminneq udvalginut nalunaarutissaaat pissagutsigit kisianni avataaninngaanniit inuttalersuisarat ta aamma ullumikkut taamaaliussagatta, taakkua tamanut ammasumik akornatsinni oqallisigineqarneat aliikkusersuutigissallugu isumaqarpunga pisariaqanngitsoq, aamma taanna ataqineqartarpoq maani.

Ataatsimiinneq ammasoq tassunga killeqarpoq maannakkullu ataatsimiinneq matuvoq.